

# **Yudaya Mangɛe xa Taruxui Sɛniyenxi singe Masenyi nde yi Kitaabui xa fe ra**

Isirayila findixi Ala xa pama nan na. E xa taruxui noma lonni belebele fide to mixie ma, barima na kui won noma a kolonde a lanma Ala xa konyie xa jɛrɛ ki naxɛ. Na taruxui toma kitaabui naani kui. Firin xili «Isirayila Mangɛe xa Taruxui,» yi boore firinyie xili «Yudaya Mangɛe xa Taruxui.» A singe, Isirayila nu lanxi si keren nan ma, kɔnɔ sɛti keren to kuye batu folo, a naxa findi Isirayila pama ra, boore sɛti naxa findi Yudaya pama ra. Mangɛe birin xa taruxui sebɛxi «Isirayila Mangɛe xa Taruxui» firinyi kui. «Yudaya Mangɛe xa Taruxui» firinyi, Yudaya mangɛe xa fe nan gbansan masenma.

«Yudaya Mangɛe xa Taruxui» kitaabui singe foloma sora solomanaani nan ma, naxee mixi xilie masenma naxee bara lu dunja kelifɛ baba Adama xa waxati han mangɛ Solu xa waxati. Solu findixi Isirayila mangɛ singe nan na. Ala naxa a sugandi, kɔnɔ a mu bu Ala xa kira xɔn ma. Na na a ra, Ala naxa Dawuda ti a jɔxɔɛ ra. Dawuda findixi Isirayila mangɛ xungbe nan na, naxan fata pama rapɛɛɛɛɛɛ, a man fata birade Ala xa seriye fɔxɔ ra. Ala naxa barake sa a xa fe ma han a xili xungbe soto dunja birin ma. Ala naxa saate tongo Dawuda nun a bɔnsɔɛ bɛ, a xa di nde

xa Ala xa pama rapere abadan. Na taruxui birin sebexi yi kitaabui singe nan kui.

«Yudaya Mangɛɛ xa Taruxui» kitaabui firin nde foloma Dawuda xa di Sulemani xa mangɛya xa taruxui nan ma. Sulemani naxa bira a baba jere ki foxo ra. A naxa pama yamari lonni ra, a man naxa Ala batu soobe ra. Ala naxa tin Sulemani xa a xa horomobanxi ti Darisalamu.

Sulemani to faxa, a xa di Robowami naxa ti a joxoe ra. Robowami naxa a tuli mati a lanfanmae xa marasi ra naxee bara a niya Isirayilakae boje xa rapaaxu e ma. Isirayila bonsoe fu naxa mini Robowami xa yaamari bun ma, e Yerobowami ti e xa mange ra. Robowami xa mangɛya xili ne Yudaya, Yerobowami xa mangɛya xili ne Isirayila.

Mange naxee tixi Robowami dangi xanbi, ndee findixi mange fanyie nan na naxee bira Ala xa seriye foxo ra. Konon ndee mu tin Ala xa kira ra, e fa kuye batu, e mixi tooo. Na kui Ala naxa e jaxankata si gbeteɛ saabui ra naxee fa e gerede. Yudayakae to na tooo to, e naxa gbilen Ala ma, Ala fan naxa e tongo, a e mali node e yaxuie ra. Mange fanyie nun mange jaaxie nu fa masara e boore tagi. Na mooli naxa bu je keme saxan je tongo solofere nun firin. A raponyi Ala naxa a lu Isirayila nun Yudaya yaxuie xa no e ra, e e xanin konyiya kui Asiriya nun Babilon boxi ma.

Yi taruxui makinikini, barima a a masenma won be mixi naxan na heeri kui, e noma Ala rabolode, na fa findi konyiya xorochoe ra e be. Ala xa won natanga na ma. Isirayila pama xa findi misaali ra won be. Xa won luma Ala xa kira xon ma, won ma dunijeigiri fanma ne, konon xa won

tondima na ra, won tʻore gbansan nan sʻotoma.  
Ala xa na lonni raso won xaxili kui. Amina.

## **Yudaya Mangʻe xa Taruxui Sʻeniyenxi singe**

*Benba Adama han Annabi Iburahima  
(Fe Fʻolʻ Fʻole 5:1-32, 10:1-32, 11:10-32)*

<sup>1</sup> Adama naxa Seti sʻoto. Seti naxa Enosi sʻoto.  
Enosi naxa Kenan sʻoto.

<sup>2</sup> Kenan naxa Mahalaleli sʻoto. Mahalaleli naxa  
Yeredi sʻoto.

<sup>3</sup> Yeredi naxa Enoki sʻoto. Enoki naxa Metusela  
sʻoto. Metusela naxa Lemeki sʻoto.

<sup>4</sup> Lemeki naxa Nuha sʻoto. Nuha naxa di xeme  
saxan sʻoto: Semi, Hami, nun Yefeti.

<sup>5</sup> Yefeti xa die nan ya: Gomeri, Magogo,  
Madayi, Yawani, Tubali, Meseki, nun Tirasi.

<sup>6</sup> Gomeri xa die nan ya: Asikenasi, Rifati, nun  
Togarama.

<sup>7</sup> Yawani xa die nan ya: Elisaha, Tarasisi,  
Kitimi, nun Rodanimi.

<sup>8</sup> Hami xa die nan ya: Kusi, Misirayimi, Puti,  
nun Kanaan.

<sup>9</sup> Kusi xa die nan ya: Seba, Xawila, Sabata,  
Raama, nun Sabiteka. Raama xa die nan ya:  
Seeba nun Dedan.

<sup>10</sup> Kusi naxa Nimirodi bari, naxan findi geresoe  
singe ra adamadie tagi.

<sup>11</sup> Misirayimi naxa die sʻoto, naxee findixi  
Ludukae, Anamikae, Lehabakae, Nafatukae,

<sup>12</sup> Patirusukae, Kasaluxukae, nun Kafatorokae  
ra. Filisitakae benba na Kafatoro nan na.

<sup>13</sup> Kanaan naxa die sʻoto, naxee findixi  
Sidonkae, Xitikae,

- 14 Yebusukae, Amorikae, Girigasakae,  
 15 Hiwikae, Arakakae, Sinikae,  
 16 Arawadakae, Semarakae, nun Xamatakae ra.  
 17 Semi xa die nan ya: Elama, Asuri, Arafaxadi,  
 Ludu, nun Arami. Arami xa die nan ya: Usu,  
 Xulu, Geteri, nun Meseki.  
 18 Arafaxadi naxa Sela soto. Sela naxa Eberi  
 soto.  
 19 Eberi naxa di xeme firin soto. Keren xili  
 Pelegi barima boxi itaxunxi a xa waxati. A firin  
 nde xili Yokatan.  
 20 Yokatan xa die nan ya: Alomodadi, Selefa,  
 Xasaramawete, Yera,  
 21 Hadorami, Usali, Dikila,  
 22 Obala, Abimaye, Seeba, Ofiri, Xawila, nun  
 Yobabo.  
 23 Yokatan xa die nan na ki.  
 24 Semi naxa Arafaxadi soto. Arafaxadi naxa  
 Sela soto.  
 25 Sela naxa Eberi soto. Eberi naxa Pelegi soto.  
 Pelegi naxa Rewu soto.  
 26 Rewu naxa Serugu soto. Serugu naxa Naxori  
 soto. Naxori naxa Tera soto.  
 27 Tera naxa Iburama soto naxan findi Ibu-  
 rahima ra.

*Annabi Iburahima xa die*  
*(Fe Fɔɔ Fɔɔ 25:1-4, 12-16)*

- 28 Iburahima xa die nan ya: Isiyaga nun  
 Sumayila.  
 29 Sumayila xa die nan ya: Sumayila xa di singe  
 Nebayoti, Kedari, Adabeeli, Mibisami,  
 30 Misema, Duma, Masa, Hadada, Tema,  
 31 Yeturi, Nafisi, nun Kedema. Sumayila xa die  
 nan na ki.

<sup>32</sup> Iburahima xa konyi ginε Ketura xa die nan ya a naxee bari Iburahima be: Simiran, Yokosan, Medan, Madiyan, Yisebaki, nun Suuwa. Yokosan naxa Seeba nun Dedan soto.

<sup>33</sup> Madiyan naxa Efa, Efere, Xanoki, Abida, nun Elidaa soto. Yi die birin fatanxi Ketura nan na.

<sup>34</sup> Iburahima naxa Isiyaga soto. Isiyaga xa die nan ya: Esayu nun Isirayila.

<sup>35</sup> Esayu xa die nan ya: Elifasi, Reyuweli, Yeyusu, Yalami, nun Kora.

<sup>36</sup> Elifasi xa die nan ya: Teman, Omaru, Sefi, Gatami, Kenasi, Timina, nun Amaleki.

<sup>37</sup> Reyuweli xa die nan ya: Naxati, Sera, Saama, nun Misa.

<sup>38</sup> Seyiri xa die nan ya: Lotan, Sobali, Sibeyon, Ana, Dison, Eseri, nun Disan.

<sup>39</sup> Lotan xa die nan ya: Xori nun Homami. Lotan maaginε xili Timina.

<sup>40</sup> Sobali xa die nan ya: Aliban, Manaxati, Ebali, Sefi, nun Onan. Sibeyon xa die nan ya: Aya nun Ana.

<sup>41</sup> Ana xa di xili Dison. Dison xa die nan ya: Xemedan, Eseban, Yitiran, nun Keran.

<sup>42</sup> Eseri xa die nan ya: Bilihan, Saawan, Yaakan. Disan xa die nan ya: Usu nun Aran.

<sup>43</sup> Mang'ee nan ya naxee bara Edon boxi yamari beenu Isirayilakae xa mang'ee nde soto: Beyori xa di Bela, naxan kelixi Dinhaba taa.

<sup>44</sup> Bela to faxa, Sera xa di Yobabo, naxan kelixi Bosara, naxa boxi yamari.

<sup>45</sup> Yobabo to faxa, Xusama, naxan kelixi Teman, naxa boxi yamari.

<sup>46</sup> Xusama to faxes, Bedada xa di Hadada, naxan nu bara Madiyankae bonbo Mowaba boxi ma, naxa boxi yamari. A kelixi Abiti taa ne.

<sup>47</sup> Hadada to faxes, Masareka Samala naxa boxi yamari.

<sup>48</sup> Samala to faxes, Sawulu naxan kelixi Rehoboti, taa naxan na xure de ra, naxa boxi yamari.

<sup>49</sup> Sawulu to faxes, Akibori xa di Bali Xanan naxa boxi yamari.

<sup>50</sup> Bali Xanan to faxes, Hadada, naxan kelixi Pawu, naxa boxi yamari. A xa gine xili Mehetabeli. Na nga xili Matiredi, a mama xili Mesahabi.

<sup>51</sup> Hadada fan naxa faxes.

Edon mangʻee nan ya: Timina, Aliba, Yeteti,

<sup>52</sup> Oholibama, Ela, Pinon,

<sup>53</sup> Kenasi, Teman, Mibisari,

<sup>54</sup> Magadiyeli, nun Irami. Edon mangʻee nan na ki.

## 2

### *Isirayila xa die*

<sup>1</sup> Isirayila xa die nan ya: Ruben, Simeyon, Lewi, Yuda, Isakari, Sabulon,

<sup>2</sup> Dana, Yusufu, Bunyamin, Nafatali, Gadi, nun Aseri.

<sup>3</sup> Yuda xa die nan ya: Eri, Onan, Sela. Suwa xa di gine Kanaanka nan e barixi. Yuda xa di singe Eri naxa fe naaxi raba Alatala ya i. A a faxes na nan ma.

<sup>4</sup> Yuda xa mamadi Tamari naxa Peresi nun Sera bari a be. Yuda di suuli soto na ki ne.

<sup>5</sup> Peresi xa die nan ya: Xesiron nun Xamuli.

<sup>6</sup> Sera xa di suulie nan ya: Simiri, Etani, Heman, Kalikoli, nun Darada.

<sup>7</sup> Karimi naxa Akan soto, naxan bara fe jaaxi raba Isirayila ra a to se ratonxi tongo.

<sup>8</sup> Etani naxa Asaraya soto.

<sup>9</sup> Xesiron xa die nan ya: Yerameeli, Rami, nun Kalebi.

<sup>10</sup> Rami naxa Aminadabo soto. Aminadabo naxa Naxason soto, naxan findi Yudayakae xa mangʻe ra.

<sup>11</sup> Naxason naxa Salimon soto. Salimon naxa Boosu soto.

<sup>12</sup> Boosu naxa Obedo soto. Obedo naxa Yisayi soto.

<sup>13</sup> Yisayi xa die nan ya: Eliyabi, a xa di singe, Abinadabo, a xa di firin nde, Simeya, a xa di saxan nde,

<sup>14</sup> Netaneeli, a xa di naani nde, Radayi, a xa di suuli nde,

<sup>15</sup> Osemi, a xa di senni nde, nun Dawuda, a xa di solofere nde.

<sup>16</sup> Yisayi xa di ginʻee nan ya: Seruya nun Abigayili. Seruya naxa di xeme saxan soto: Abisayi, Yowaba, nun Asaheli.

<sup>17</sup> Abigayili naxa Amasa soto Yeteri be, naxan fatanxi Sumayila bonsœ ra.

<sup>18</sup> Xesiron xa di Kalebi naxa die soto a xa ginʻe Asuba ra. E xili Yesere, Sobabo, nun Aradon. A xa ginʻe Yeriyoti fan naxa di nde soto a be.

<sup>19</sup> Asuba to faxa, Kalebi naxa Efarata doxo, naxan Xuru bari a be.

<sup>20</sup> Xuru naxa Uri soto. Uri naxa Besaleli soto.

<sup>21</sup> Xesiron to je tongo senni soto, a naxa Galadi baba Makiri xa di ginʻe doxo. E naxa Segubu soto.

<sup>22</sup> Segubu naxa Yayiri soto, naxan taa moxoɲen nun saxan yaamari Galadi boxi ma.

<sup>23</sup> Gesurikae nun Siriyakae naxa Yayiri xa taee soto a nun Kenata nun taa tongo senni naxee na a rabilinyi. Yi mixi birin kelixi Makiri bɔnsɔe ne, Galadi baba.

<sup>24</sup> Xesiron to faxa Kalebi Efarata, a xa ginε Abiya naxa Asexuri bari a be, naxan findi Tekowa baba ra.

<sup>25</sup> Xesiron xa di singe Yerameeli xa die nan ya: Rami, a xa di singe, Buna, Oreni, Osemi, nun Ahiya.

<sup>26</sup> Yerameeli xa ginε boore Atara naxa Onan soto.

<sup>27</sup> Yerameeli xa di singe Rami xa die nan ya: Maasa, Yamin, nun Ekeri.

<sup>28</sup> Onan ma die nan ya: Samayi nun Yada. Samayi xa die nan ya: Nadabo nun Abisuri.

<sup>29</sup> Abisuri xa ginε Abixayili naxa Axaban nun Molidi soto.

<sup>30</sup> Nadabo xa die nan ya: Seleda nun Apayimi. Seleda naxa faxa a ditare ra.

<sup>31</sup> Apayimi naxa Yiseyi soto. Yiseyi naxa Sesaan soto. Sesaan naxa Axalayi soto.

<sup>32</sup> Samayi xunya Yada xa di nan ya: Yeteri nun Yonatan. Yeteri naxa faxa a ditare ra.

<sup>33</sup> Yonatan xa die nan ya: Peleta nun Sasa. Yerameeli xa die nan na ki.

<sup>34</sup> Sesaan mu di xeme yo soto fo di ginεe. A xa konyi Misiraka xili Yara.

<sup>35</sup> Sesaan naxa a xa di ginε fi a xa konyi Yara ma. A naxa Atayi bari.

<sup>36</sup> Atayi naxa Natan soto. Natan naxa Sabadi soto.



<sup>37</sup> Sabadi naxa Efilali soto. Efilali naxa Obedo soto.

<sup>38</sup> Obedo naxa Yehu soto. Yehu naxa Asaraya soto.

<sup>39</sup> Asaraya naxa Xelesi soto. Xelesi naxa Eleyasa soto.

<sup>40</sup> Eleyasa naxa Sisimayi soto. Sisimayi naxa Salumu soto.

<sup>41</sup> Salumu naxa Yekamiya soto. Yekamiya naxa Elisama soto.

<sup>42</sup> Yerameeli xunya Kalebi xa di singe xili Mesa. Mesa naxa Sifi nun Maresa soto, naxan findi Xebiron baba ra.

<sup>43</sup> Xebiron xa die nan ya: Kora, Tapuwa, Rekemi, nun Sema.

<sup>44</sup> Sema naxa Raxami soto. Raxami naxa Yoreyami soto. Rekemi naxa Samayi soto.

<sup>45</sup> Samayi naxa Mayon soto. Mayon naxa Beti Suru soto.

<sup>46</sup> Kalebi xa konyi ginε Efa xa die nan ya: Xarani, Mosa, nun Gasesi. Xarani naxa Gasesi soto.

<sup>47</sup> Yadayi xa die nan ya: Regemi, Yotami, Gesana, Peleti, Efa, nun Saafi.

<sup>48</sup> Kalebi xa konyi ginε Maaka xa die nan ya: Seberi nun Tirana.

<sup>49</sup> A man naxa Madamanna baba Saafi nun Makabena nun Gibiya baba Sewa bari. Kalebi xa di ginε xili Akasa.

<sup>50</sup> Kalebi xa die nan ya: Sobali, Xuru xa di, a xa ginε Efarata xa di singe, Kiriyati Yeyarimi baba,

<sup>51</sup> Salima, Betεεemu baba, nun Xarefa, Beti Gaderi baba.

<sup>52</sup> Kiriyati Yeyarimi baba Sobali xa die nan ya: Harowe, Menuhoti bonsœ tagi.

<sup>53</sup> Kiriyati Yeyarimi xabilee nan ya: Itirikae, Putikae, Suumaka, nun Miserayikae. Sorey-atakae nun Esetayolikae fatanxi e tan nan na.

<sup>54</sup> Salima xa die nan ya: Beteleemu, Netofakae, Atiroti Beti Yowaba, Menuhoti bonsøe tagi, Sorahakae,

<sup>55</sup> sebelitie xabile naxee sabatixi Yabesi, Tiratikae, Simeyatakae, nun Sukatikae. Kenikae nan na ki, naxee fatanxi Xamata, Rekabu baba ra.

### 3

#### *Mangʻe Dawuda xa die*

<sup>1</sup> Dawuda xa di naxee barixi Xebiron, nee nan ya: A xa di singe Aminon, naxan nga findi Axinowama ra Yisireelika, a xa di firin nde Daniyeli, naxan nga findi Abigayili ra Karemeleka,

<sup>2</sup> a xa di saxan nde Abisalomi, naxan nga findi Gesuri mangʻe Talamayi xa di gine Maaka ra, a xa di naani nde Adoniya, naxan nga findi Xagiti ra,

<sup>3</sup> a xa di suuli nde Sefataya, naxan nga findi Abitali ra, a xa di senni nde Yitireyami, naxan nga findi Egela ra.

<sup>4</sup> Yi di senni barixi Xebiron ne. Dawuda naxa mangʻeya raba Xebiron ne solofere, kike senni, a naxa mangʻeya raba Darisalamu ne tongo saxan nun saxan.

<sup>5</sup> Di naani nan ya a naxee soto Darisalamu Amiyeli xa di gine Batiseba ra: Simeya, Sobabo, Natan, Sulemani.

<sup>6</sup> Dawuda xa di solomanaanie nan ya: Yibixari, Elisuwa, Elifeleti,

<sup>7</sup> Noga, Nefegi, Yafiya,

<sup>8</sup> Elisama, Eliyada, nun Elifeleti.

<sup>9</sup> Dawuda xa die, a naxee soto konyi ginʻee saabui ra mu na yi die ya ma. Tamari findi e maagine nan na.

### *Yudaya Mangʻe*

<sup>10</sup> Sulemani naxa Robowami soto. Robowami naxa Abiya soto. Abiya naxa Asa soto. Asa naxa Yehosafati soto.

<sup>11</sup> Yehosafati naxa Yorami soto. Yorami naxa Axasiya soto. Axasiya naxa Yowasi soto.

<sup>12</sup> Yowasi naxa Amasiya soto. Amasiya naxa Asaraya soto. Asaraya naxa Yotami soto.

<sup>13</sup> Yotami naxa Axasi soto. Axasi naxa Xesekiya soto. Xesekiya naxa Manasi soto.

<sup>14</sup> Manasi naxa Amon soto. Amon naxa Yosiya soto.

<sup>15</sup> Yosiya xa di singe naxa findi Yoxanan na, a xa di firin nde, Yehoyakimi, a xa di saxan nde, Sidekiya, nun a xa di naani nde, Salumu.

<sup>16</sup> Yehoyakimi naxa Yekoniya nun Sidekiya soto.

### *Yudaya Mangʻe xoreya soto xanbi*

<sup>17</sup> Mangʻe Yekoniya naxan nu na konyiya kui, a xa die nan ya: Salatiyeli,

<sup>18</sup> Malakirami, Pɛdaya, Seenasari, Yekamiya, Hosama, nun Nedabiya.

<sup>19</sup> Pɛdaya xa die nan ya: Sorobabeli nun Simeyi. Sorobabeli xa die nan ya: Mesulama nun Xananiya. Selomiti naxa findi e maagine ra.

<sup>20</sup> Pɛdaya xa di suuli booree nan ya: Xasuba, Oheli, Berekiya, Xasadiya, nun Yusabi Xeseda.

<sup>21</sup> Xananiya xa die nan ya: Pelataya, Yesaya, Refaya xa die, Aranan xa die, Abadiyasi xa die, Sekanaya xa die.

<sup>22</sup> Sekanaya xa di findi Semaya nan na. Semaya xa die nan ya: Xatusi, Yigali, Bariya, Neyaraya, nun Safati, e birin nalanxi mixi senni.

<sup>23</sup> Neyaraya xa die nan ya: Eliyowenayi, Xisikiya, nun Asirikama, e birin nalanxi mixi saxan.

<sup>24</sup> Eliyowenayi xa die nan ya: Hodafiya, Eliyasibu, Pelaya, Akubu, Yoxanan, Delaya, nun Anani, e birin nalanxi mixi solofere.

## 4

### *Yuda xabilʻe*

<sup>1</sup> Yuda xa die nan ya: Peresi, Xesiron, Karimi, Xuru nun Sobali.

<sup>2</sup> Sobali xa di Reyaya naxa Yaxati soto. Yaxati naxa Axumayi nun Lahadi soto. Soreyatakae xabilʻe fatanxi nee nan na.

<sup>3</sup> Etami xa die nan ya: Yisireeli, Yisema, nun Yidibasi. E maagine xili Haseleliponi.

<sup>4</sup> Penuweli findi Gedori baba nan na. Eseri naxa findi Xusa baba ra. Yi mixie fatanxi Xuru nan na, Efarata xa di singe, Betelʻemu baba.

<sup>5</sup> Tekowa baba Asexuri naxa gine firin doxo, Xela nun Nayara.

<sup>6</sup> Nayara naxa Axusami, Xeferi, Temeni, nun Axasetari bari Asexuri be.

<sup>7</sup> Xela naxa Sereti, Soxara, Etenani, nun Kosi bari a be.

<sup>8</sup> Kosi naxa Anubi nun Sobeba soto, a nun Harumi xa di Axaraxeli xabilʻe.

<sup>9</sup> Yabesi naxa binye soto dangife a ngaxakerenyie birin na. A nga naxa a xili sa Yabesi barima a a soto tōore nan kui.

<sup>10</sup> Yabesi naxa Isirayila Marigi Ala maxandi, «I xa barake sa n ma, i xa n ma bōxi xun masa, i xa n mali i senbe ra, i xa n natanga tōore ma.» Ala naxa a xa dube suxu.

<sup>11</sup> Suuxa ngaxakerenyi Kelubu naxa Mexiri soto. Mexiri naxa Eseton soto.

<sup>12</sup> Eseton naxa Beti Rafa, Paseya, nun Texinna soto. Texinna naxa Iri Naxasa soto. Yi mixie findixi Rekakae nan na.

<sup>13</sup> Kenasi xa die nan ya: Otiniyeli nun Seraya. Otiniyeli xa die nan ya: Xatati nun Meyonotayi.

<sup>14</sup> Meyonotayi naxa Ofara soto. Seraya naxa Yowaba soto, naxan findi xabuie baba ra naxee nu na Xabuie xa gulunba.

<sup>15</sup> Yefune xa di Kalebi xa die nan ya: Iru, Ela, nun Naami. Ela naxa Kenasi soto.

<sup>16</sup> Yehaleleli xa die nan ya: Sifi, Sifa, Tiriya, nun Asareeli.

<sup>17</sup> Esira xa die nan ya: Yeteri, Meredi, Efere, nun Yalon. Meredi xa gine nde naxa Mariyama, Samayi, nun Yiseba bari. Yiseba naxa findi Esitemowa baba ra.

<sup>18</sup> Meredi xa gine Yudayaka xa die nan ya: Gedori baba Yeredi, Soko baba Xeberi, Sanowa baba Yekutiyeli. Firawuna xa di Bitiya, naxan nu bara dōxo Meredi xon ma, na nan na die bari.

<sup>19</sup> Hodiya xa gine, Naxami maagine, naxa Keyila baba Garimika soto, a nun Esitemowa Maakaka.

<sup>20</sup> Simon xa die nan ya: Aminon, Rinna, Ben Xanan, nun Tilon. Yiseyi naxa Soxeti nun Ben

Soxeti soto.

<sup>21</sup> Yuda xa di Sela xa die nan ya: Leka baba Eri, Maresa baba Laada, Asibeya xabile naxee dugi yailanma,

<sup>22</sup> Yokimi, Kosebakae, Yowasi, nun Sarafi, naxan Mowaba nun Yasubi Lexemi yaamari kabi temui xonnakuye.

<sup>23</sup> E tan nan nu feɲe yailanma mange be Netayimi nun Gedera taae kui e nu sabatixi dennaxe.

### *Simeyɔn xa die*

<sup>24</sup> Simeyɔn xa die nan ya: Nemuweli, Yamin, Yaribu, Sera, nun Sawulu.

<sup>25</sup> Sawulu naxa Salumu soto. Salumu naxa Mibisami soto. Mibisami naxa Misema soto.

<sup>26</sup> Misema naxa Xamuweli soto. Xamuweli naxa Sakuru soto. Sakuru naxa Simeyi soto.

<sup>27</sup> Simeyi naxa di xeme fu nun senni nun di ginɛ senni soto. A ngaxakerenyie mu di gbegbe soto. E xabilee mu wuya alo Yuda bɔnsɔe.

<sup>28</sup> E sabatixi Beriseeba, Molada, Xasari Suwali,

<sup>29</sup> Bila, Esemi, Toladi,

<sup>30</sup> Betuweli, Horoma, Sikilaga,

<sup>31</sup> Beti Marakaboti, Xasari Susimi, Beti Biri, nun Saarayimi. E naxa lu na taae kui han Dawuda xa mangeya temui.

<sup>32</sup> E man nu na Etami, Ayin, Rimɔn, Token, nun Asan, na taa suuli

<sup>33</sup> nun e rabilinyi han Baalati. E xa bɔxie nun e benbae nan na ki.

<sup>34</sup> Simeyɔn bɔnsɔe xunyie nan ya: Mesobabo, Yameleki, Amasiya xa di Yosa,

<sup>35</sup> Yoweli, Yosibiya xa di Yehu, Asiyeli xa di Seraya,

<sup>36</sup> Eliyowenayi, Yaakoba, Yesohaya, Asaya, Adiyeli, Yesimiyeli, Benaya,

<sup>37</sup> nun Sisa, Sifeyi xa di, Alon xa di, Yedaya xa di, Simiri xa di, Semaya xa di.

<sup>38</sup> Xabilɛe mangɛe nan na ki. E xa denbayae naxa wuya ki fanyi ra.

<sup>39</sup> E naxa siga han Gedori gulunba sogetede nooge yire fende e xa xurusee bɛ.

<sup>40</sup> E naxa fili fanyie to naa. A belebele, mixi yo mu nu na. Singe Hami bɔnsɔɛ nan nu na menni.

<sup>41</sup> Yudaya mangɛ Xesekiya xa waxati kui, yi mixi naxee xili seɓɓxi, e naxa siga naa, e banxie birin kana, e mennikae ratɔn alako e xa sabati na, nooge fanyi nu na dennaxe e xa xurusee bɛ.

<sup>42</sup> Simeyɔn bɔnsɔɛ mixi kɛmɛ suuli naxa siga Seyiri geyae yire. E xa yareratɛe findi Yiseyi xa die nan na, Pelataya, Neyaraya, Refaya, nun Yusiyeli.

<sup>43</sup> E to gɛ Amalɛkikae bɔnbɔde, naxee nu luxi naa, e naxa sabati menni. Han to e bɔnsɔɛe na naa.

## 5

### *Ruben xa die*

<sup>1</sup> Isirayila xa di singe findi Ruben nan na, kɔnɔ di singe tide naxa ba a yi ra, a so Isirayila xa di Yusufu xa die yi ra, barima Ruben nu bara a baba xa ginɛ kolon ginɛ ra.

<sup>2</sup> Yuda naxa senɓɛ sɔtɔ a ngaxakerenyie tagi han mangɛya naxa lu a bɔnsɔɛ yi, kɔnɔ di singe tide tan naxa lu Yusufu xa die yi.

<sup>3</sup> Isirayila xa di singe Ruben xa die nan ya: Xanoki, Palu, Xesiron, nun Karimi.

<sup>4</sup> Yoweli bõnsõe nan ya: Semaya naxa Gogo soto. Gogo naxa Simeyi soto.

<sup>5</sup> Simeyi naxa Mike soto. Mike naxa Reyaya soto. Reyaya naxa Bali soto.

<sup>6</sup> Bali naxa Bëera soto. Asiriya mange Tigilati Pileseri naxa Ruben bõnsõe mang'edi Bëera xanin konyiya kui.

<sup>7</sup> Bëera ngaxakerenyie nan ya, e xabilë ki ma: Yeyiyeli, Sakari,

<sup>8</sup> nun Bela, Asasi xa di, Sema xa di, Yoweli xa di. E naxa sabati bõxi ma fõlõfe Aroweri sa dõxõ Nebo nun Bali Meyoni ra.

<sup>9</sup> E nu sabatixi gbengberenyi fõle ma, han Efirati xure ra. Xuruse gbege nu na e yi ra Galadi bõxi ma.

<sup>10</sup> Mange Solu xa waxati kui, Ruben bõnsõe naxa Hagarikae gere, naxee nu na Galadi naaninyi sogetede biri.

### *Gadi xa die*

<sup>11</sup> Gadi bõnsõe nun Ruben bõnsõe sabatixi e boore nan ya i Basan bõxi kui, han Salaka.

<sup>12</sup> E xilie nan ya: Yoweli, mixi singe, Safami, a firin nde, Yaanayi, nun Safati naxee nu na Basan bõxi ma.

<sup>13</sup> E xunya solofere nan ya: Mikayeli, Mesulama, Seeba, Yorayi, Yakan, Siya, nun Eberi.

<sup>14</sup> Abixayili xa die nan na ki, Xuri xa di, Yarowa xa di, Galadi xa di, Mikayeli xa di, Yesisayi xa di, Yado xa di, Busi xa di.

<sup>15</sup> Abidiyeli xa di Axi, Guni xa mamadi, e naxa findi e xabilëe xunyi ra.



16 E sabatixi Galadi, Basan, na rabilinyi, han Saron naaninyie ra.

17 Yudaya mangɛe Yotami nun Isirayila mangɛe Yerobowami naxa e xilie sɛbɛ.

18 Ruben bɔnsɔɛ, Gadi bɔnsɔɛ, nun Manasi bɔnsɔɛ sɛɛti keren, e xa sɔori xasabi sigama han mixi wulu tongo naani nun naani, mixi kɛmɛ solofere tongo senni. E birin fata gere sode. Makantase, santidɛgɛma, nun xali nu na e yi ra.

19 E naxa Hagarikae, Yeturikae, Nafisikae, nun Nodabokae gere.

20 Ala naxa xun nakeli fi e ma Hagarikae xun ma, barima e nu bara Ala maxandi gere kui. Ala naxa e xa duba suxu barima e laxi a ra.

21 E naxa e yaxuie xa xurusee ba e yi: ɲɔxɔmɛ wulu tongo suuli, yɛxɛɛ nun si wulu kɛmɛ firin tongo suuli, nun sofale wulu firin. E naxa mixi wulu kɛmɛ fan suxu.

22 E e yaxui gbegbe faxa nɛ barima na gere kelixi Ala yati nan ma. E naxa sabati naa han e siga konyiya kui tɛmui naxɛ.

### *Manasi bɔnsɔɛ sɛɛti keren*

23 Manasi bɔnsɔɛ sɛɛti keren sabatixi bɔxi nan ma naxan fɔlɔxi Basan han Bali Xerimon, sa dɔxɔ Seniri, nun Xerimon geya ra. E wuya.

24 E xa denbaya mangɛe nan ya: Efere, Yiseyi, Eliyeli, Asiriyeli, Yeremi, Hodafiya, nun Yaxadiyeli. Yi denbaya mangɛe sɛnbɛ gbo, naafuli gbegbe na e yi.

25 Kɔnɔ e naxa e babae Marigi Ala yanfa, e mennikae xa kuyee batu, Ala nɔ naxee ra a singe.

26 Na kui Ala naxa a niya, Asiriya Mangɛe Pulu nun Tigilati Pileseri bɔɲɛ xa te, e fa Ruben

bonsœ, Gadi bonsœ, nun Manasi bonsœ tagi xanin Xala, Xaboro, nun Hara, han Gosan xure e na dennaxe han to.

<sup>27</sup> Lewi xa die nan ya: Gerison, Kehati, nun Merari.

<sup>28</sup> Kehati xa die nan ya: Amarama, Yisehari, Xebiron, nun Yusiyeli.

<sup>29</sup> Amarama di xeme firin nan soto, Haruna nun Munsa, a nun di gine keren, Mariyama. Haruna xa die nan ya: Nadabo, Abihu, Eleyasari, nun Itamari.

<sup>30</sup> Eleyasari naxa Finexasi soto. Finexasi naxa Abisuwa soto.

<sup>31</sup> Abisuwa naxa Buuki soto. Buuki naxa Usi soto.

<sup>32</sup> Usi naxa Seraxaya soto. Seraxaya naxa Merayoti soto.

<sup>33</sup> Merayoti naxa Amaraya soto. Amaraya naxa Axituba soto.

<sup>34</sup> Axituba naxa Sadoki soto. Sadoki naxa Aximaasi soto.

<sup>35</sup> Aximaasi naxa Asaraya soto. Asaraya naxa Yoxanan soto.

<sup>36</sup> Yoxanan naxa Asaraya soto, naxan findi serexedube ra Ala xa horomobanxi kui Sulemani naxan tixi Darisalamu.

<sup>37</sup> Asaraya naxa Amaraya soto. Amaraya naxa Axituba soto.

<sup>38</sup> Axituba naxa Sadoki soto. Sadoki naxa Salumu soto.

<sup>39</sup> Salumu naxa Xilikiya soto. Xilikiya naxa Asaraya soto.

<sup>40</sup> Asaraya naxa Seraya soto. Seraya naxa Yehosadaki soto.

<sup>41</sup> Alatala to Yudaya nun Darisalamu xanin konyiya kui, Nebukadansari naxa Yehosadaki

xanin a xun ma.

## 6

### *Lewi xa die*

<sup>1</sup> Lewi xa die nan ya: Gerison, Kehati, nun Merari.

<sup>2</sup> Gerison ma die nan ya: Libini nun Simeyi.

<sup>3</sup> Kehati xa die nan ya: Amarama, Yisehari, Xebiron, nun Yusiyeli.

<sup>4</sup> Merari xa die nan ya: Maxali nun Musi.

<sup>5</sup> Lewi bõnsõee babae nan ya: Gerison naxa Libini soto. Libini naxa Yaxati soto. Yaxati naxa Sima soto.

<sup>6</sup> Sima naxa Yowa soto. Yowa naxa Ido soto. Ido naxa Sera soto. Sera naxa Yeyaterayi soto.

<sup>7</sup> Kehati xa die nan ya: Kehati naxa Aminadabo soto. Aminadabo naxa Kora soto. Kora naxa Asiri soto.

<sup>8</sup> Asiri naxa Elekana soto. Elekana naxa Ebiyasafi soto. Ebiyasafi naxa Asiri soto.

<sup>9</sup> Asiri naxa Taxati soto. Taxati naxa Uriyeli soto. Uriyeli naxa Yusiya soto. Yusiya naxa Sawulu soto.

<sup>10</sup> Elekana xa die nan ya: Amasayi nun Aximoti.

<sup>11</sup> Elekana naxa Sofayi soto. Sofayi naxa Naxati soto.

<sup>12</sup> Naxati naxa Eliyabi soto. Eliyabi naxa Yeroxama soto. Yeroxama naxa Elekana soto.

<sup>13</sup> Elekana naxa Samuweli soto. Samuweli xa die nan ya: Yoweli, a xa di singe, nun Abiya.

<sup>14</sup> Merari xa die nan ya: Merari naxa Maxali soto. Maxali naxa Libini soto. Libini naxa Simeyi soto. Simeyi naxa Usa soto.

15 Usa naxa Simeya soto. Simeya naxa Xagiya soto. Xagiya naxa Asaya soto.

*Bēetibae Dawuda xa waxati*

16 Saate kankira to dɔxɔ Alatala xa hɔrɔmɔlingira kui, Dawuda naxa bēetibae sugandi naxee bēeti bama.

17 Singe e nu bēeti bama Alatala xa hɔrɔmɔlingira nan ya ra, Kiri Banxi Naralande. E naxa na wali raba menni han mange Sulemani Alatala xa hɔrɔmɔbanxi tixi Darisalamu temui naxe.

18 Bēetibae xilie nan ya a nun e xa die: Kehati xabile ya ma, Heman bēetiba, Yoweli xa di, Samuweli xa di,

19 Elekana xa di, Yeroxama xa di, Eliyeli xa di, Towa xa di,

20 Sufu xa di, Elekana xa di, Maxati xa di, Amasayi xa di,

21 Elekana xa di, Yoweli xa di, Asaraya xa di, Sefaniya xa di,

22 Taxati xa di, Asiri xa di, Ebiyasafi xa di, Kora xa di,

23 Yisehari xa di, Kehati xa di, Lewi xa di, Isirayila xa di.

24 Heman malima, naxan nu tixi a yirefanyi ma, na findi Asafi nan na, Berekiya xa di, Simeya xa di,

25 Mikayeli xa di, Baaseya xa di, Malakiya xa di,

26 Etini xa di, Sera xa di, Adaya xa di,

27 Etani xa di, Sima xa di, Simeyi xa di,

28 Yaxati xa di, Gerison ma di, Lewi xa di.

<sup>29</sup> Naxee kelixi Merari xabile ya ma, nee nu tima koola nan ma. E xunyi findi Etani nan na, Kisi xa di, Abidi xa di, Maluku xa di,

<sup>30</sup> Xasabiya xa di, Amasiya xa di, Xilikiya xa di,

<sup>31</sup> Amasi xa di, Bani xa di, Semeri xa di,

<sup>32</sup> Maxali xa di, Musi xa di, Merari xa di, Lewi xa di.

<sup>33</sup> E ngaxakerenyie Lewi bənsəe ya ma, nu na Alatala xa hərəməlingira wali kui.

<sup>34</sup> Haruna nun a xa die naxa serexe gan daaxi ba serexebade fari, e man surayi gan serexe ra surayi serexebade fari. E na wali birin naba yire seniyanxi fisamante nan kui naxan findi Isirayila xunsare ra, ala Ala xa konyi Munsa a masenxi ki naxe.

<sup>35</sup> Haruna xa die nan ya: Eleyasari, a xa di Finexasi, a xa di Abisuwa,

<sup>36</sup> a xa di Buuki, a xa di Usi, a xa di Seraxaya,

<sup>37</sup> a xa di Merayoti, a xa di Amaraya, a xa di Axituba,

<sup>38</sup> a xa di Sadoki, a xa di Aximaasi.

*Lewi bənsəe xa taae*  
(Yosuwe 21:1-42)

<sup>39</sup> E xa taae nan ya e sabatixi dennaxe: Haruna xa die, naxee kelixi Kehati xabile ya ma, nee nan singe boxi soto Ala xa maragiri kui.

<sup>40</sup> Xebiron nun a rabilinyie naxa findi e gbe ra, Yudaya boxi ma,

<sup>41</sup> kəno Xebiron daaxa nun taa naxee nu na na rabilinyi, nee naxa findi Yefune xa di Kalebi gbe ra.

<sup>42</sup> Haruna xa die naxa Xebiron soto, naxan findixi mixi ratanga taa ra, e naxa Libina nun a rabilinyi, Yatiri, Esitemowa nun a rabilinyi soto,

<sup>43</sup> e naxa Xilen nun a rabilinyi, Debiri nun a rabilinyi,

<sup>44</sup> Asan nun a rabilinyi, Beti Semesi nun a rabilinyi fan soto.

<sup>45</sup> E taa naxee soto Bunyamin boxi ma nee nan ya: Gabayon, Geba, a rabilinyi, Alemeti, a rabilinyi, Anatoti, nun a rabilinyi. E naxa taa fu nun saxan soto e xabile ki ma.

<sup>46</sup> Kehati xa di booree naxa taa fu soto Ala xa maragiri kui Eframi bonsoe, Dana bonsoe seeti keren, nun Manasi bonsoe seeti keren xa boxie ma.

<sup>47</sup> Gerison ma die naxa taa fu nun saxan soto e xabile ki ma Isakari bonsoe, Aseri bonsoe, Nafatali bonsoe, nun Manasi bonsoe seeti keren xa boxie ma naxee nu na Basan boxi ma.

<sup>48</sup> Merari xa die naxa taa fu nun firin soto Ala xa maragiri kui Ruben bonsoe, Gadi bonsoe, nun Sabulon bonsoe xa boxie ma.

<sup>49</sup> Isirayilakae taae nun e rabilinyie fi Lewi bonsoe ma na ki ne.

<sup>50</sup> E naxa na taae fi e ma Ala xa maragiri kui, taa naxee nu na Yuda, Simeyon, nun Bunyamin bonsoe xa boxie ma.

<sup>51</sup> Kehati xabile booree naxa taae soto Eframi bonsoe xa boxi ma.

<sup>52</sup> E naxa mixi ratanga taa Sikemi nun a rabilinyi fi e ma Eframi geya ma, a nun Geseri, a rabilinyi,

<sup>53</sup> Yokineyami, a rabilinyi, Beti Xoron, a rabilinyi,

<sup>54</sup> Ayalon, a rabilinyi, Gati Rimon, nun a rabilinyi.

<sup>55</sup> E naxa Aneri, a rabilinyi, Bileyami, nun a rabilinyi soto Manasi bonsoe tagi xa boxi ma.

Kehati xabilɛ booree xa taae nan na ki.

<sup>56</sup> Gerison ma die xa taae nan ya: Golan, a rabilinyi, naxan na Basan bɔxi ma, Asataroti, a rabilinyi, naxee na Manasi bɔnsɔɛ tagi xa bɔxi ma,

<sup>57</sup> Kadesi, a rabilinyi, Daberati, a rabilinyi,

<sup>58</sup> Ramoti, a rabilinyi, Anemi, a rabilinyi, naxee na Isakari bɔnsɔɛ xa bɔxi ma.

<sup>59</sup> E xa taa naxee na Aseri bɔnsɔɛ xa bɔxi ma nee nan ya: Masala, a rabilinyi, Abadon, a rabilinyi,

<sup>60</sup> Hukoki, a rabilinyi, Rexobo, nun a rabilinyi.

<sup>61</sup> E xa taa naxee na Nafatali bɔnsɔɛ xa bɔxi ma, nee nan ya: Kadesi naxan na Galile bɔxi ma, Xamɔn, a rabilinyi, Kiriyatayimi nun a rabilinyi.

<sup>62</sup> Merari xa die xa taae nan ya: Rimono, a rabilinyi, Taboro, a rabilinyi, naxee na Sabulon bɔnsɔɛ xa bɔxi ma.

<sup>63</sup> E xa taa naxee na Ruben bɔnsɔɛ xa bɔxi ma Yuruden naakiri ma Yeriko ya ra, nee nan ya: Beteseri naxan na gbengberenyi ma, a rabilinyi, Yahasa, a rabilinyi,

<sup>64</sup> Kedemoti, a rabilinyi, Mefaati, a rabilinyi.

<sup>65</sup> E xa taa naxee na Gadi bɔnsɔɛ xa bɔxi ma, nee nan ya: Ramoti naxan na Galadi bɔxi ma, a rabilinyi, Maxanayimi, a rabilinyi,

<sup>66</sup> Xesibɔn, a rabilinyi, Yaaseri, nun a rabilinyi.

## 7

### *Isakari xa die*

<sup>1</sup> Isakari xa di naani nan ya: Tola, Puwa, Yasubu, nun Simiron.

<sup>2</sup> Tola xa die nan ya: Usi, Refaya, Yeriyeli, Yamayi, Yibisami, nun Samuweli. Yi mixie nan

findixi e xabile mangɛe ra. Mangɛ Dawuda xa waxati kui, Tola xa di mixi wulu mɔxɔɓɛn nun firin, kɛmɛ senni findi soorie nan na.

<sup>3</sup> Usi xa di xili Yisiraxiya. Yisiraxiya xa die nan ya: Mikayeli, Abadiyasi, Yoweli, nun Yisiya. Yi mixi suuli nan findi e xabile mangɛe ra.

<sup>4</sup> Usi xa mixi wulu tongo saxan nun senni findi soorie nan na, barima e xa ginɛe nun e xa die wuya.

<sup>5</sup> Isakari xabilɛe birin ya ma, xɛmɛ mixi wulu tongo solomasaxan nun solofere findi soori gbangbalanyie nan na.

### *Bunyamin xa die*

<sup>6</sup> Bunyamin xa die nan ya: Bela, Bekeri, nun Yediyayeli.

<sup>7</sup> Bela xa di suuli nan ya: Esibon, Usi, Yusiyeli, Yerimoti, nun Yiri. Yi mixie nan findi e xabile mangɛe ra. Soori gbangbalanyi mixi wulu mɔxɔɓɛn nun firin, tongo saxan nun naani nu na e ya ma.

<sup>8</sup> Bekeri xa die nan ya: Semira, Yowasi, Eliyeseri, Eliyowenayi, Omeri, Yeremoti, Abiya, Anatoti, nun Alemeti. Yee birin Bekeri xa die nan e ra.

<sup>9</sup> E xabilɛe xunyie xilie seɓɛxi, e soori mixi wulu mɔxɔɓɛn kɛmɛ firin nu na.

<sup>10</sup> Yediyayeli xa di xili Bilihan. Bilihan xa die nan ya: Yeyusu, Bunyamin, Exudu, Kenaana, Setani, Tarasisi, nun Axisaxari.

<sup>11</sup> Yediyayeli xa die birin findi e xabilɛe xunyie nan na. Soori mixi wulu fu nun solofere kɛmɛ firin nu na e ya ma.



<sup>12</sup> Iri xa die nan ya: Supimi nun Xupimi. Axeri xa di xili Xusimi.

*Nafatali xa die*

<sup>13</sup> Nafatali xa die nan ya: Yaxaseeli, Guni, Yeseri, nun Salumu, Bila xa di.

*Manasi xa die*

<sup>14</sup> Manasi xa die nan ya: A xa konyi ginε naxan kelixi Siriya boxi ma naxa Asireli nun Makiri bari a be. Makiri naxa Galadi soto.

<sup>15</sup> Makiri naxa ginε fen Xupimi nun Supimi be. Makiri maagine xili Maaka. Makiri xa di firin nde xili Selofexadi. Selofexadi mu di xeme yo soto, fo di ginεe.

<sup>16</sup> Makiri xa ginε Maaka naxa di bari, a xili sa Peresi xun ma. A xunya xili Seresi. Peresi xa die nan ya: Ulami nun Rakemi.

<sup>17</sup> Ulami xa di xili Bedan. Galadi xa die nan na ki, Makiri xa di, Manasi xa di.

<sup>18</sup> Galadi maagine Hamoleketi xa die nan ya: Isihodi, Abiyeseri, nun Maxala.

<sup>19</sup> Semida xa die nan ya: Axiyani, Sikemi, Likixi, nun Aniyama.

*Eframi xa die*

<sup>20</sup> Eframi xa die nan ya: Eframi naxa Sutela soto. Sutela naxa Bereda soto. Bereda naxa Taxati soto. Taxati naxa Eleyada soto. Eleyada naxa Taxati soto.

<sup>21</sup> Taxati naxa Sabadi soto. Sabadi naxa Sutela soto. Gatake naxa Eseri nun Eleyadi faxa nee to siga e xa xurusee mupade. Eseri nun Eleyadi bari menni ne.

<sup>22</sup> E baba Eframi naxa sunnun temui xonkuye. E ngaxakerenyie naxa a madundu.

<sup>23</sup> Na dangi xanbi a xa gine naxa tεεge. A to di bari, a naxa a xili sa Beriya barima toore nu bara gbo a xonyi.

<sup>24</sup> A naxa di gine soto naxan xili Seera. Na naxa Beti Xoron Labe nun Beti Xoron Fuge ti, a nun taa gbete naxan xili Useni Seera.

<sup>25</sup> Efirami naxa Refa soto. Refa naxa Resefa soto. Resefa naxa Tela soto. Tela naxa Taxani soto.

<sup>26</sup> Taxani naxa Ladana soto. Ladana naxa Amixudi soto. Amixudi naxa Elisama soto.

<sup>27</sup> Elisama naxa Nunu soto. Nunu naxa Yosuwe soto.

<sup>28</sup> E naxa sabati Beteli nun a rabilinyi, Naarani, a sogetede, Geseri nun a rabilinyi, a sogedorode, Sikemi nun a rabilinyi, han Aya nun a rabilinyi.

<sup>29</sup> Manasi bonsoe xa taae nan ya: Beti Saan, a rabilinyi, Taanaki, a rabilinyi, Megido, a rabilinyi, Doru, nun a rabilinyi. Isirayila xa di Yusufu bonsoe sabatixi yi taae nan kui.

### *Aseri xa die*

<sup>30</sup> Aseri xa die nan ya: Yimina, Yisiwa, Yisiwi, nun Beriya. E maagine xili Sera.

<sup>31</sup> Beriya xa die nan ya: Xeberi nun Malakiyeli, naxan findi Birisafiti baba ra.

<sup>32</sup> Xeberi xa die nan ya: Yefeleti, Someri, nun Xotama. E maagine xili Suwa.

<sup>33</sup> Yefeleti xa die nan ya: Pasaki, Bimali, nun Asefati. Yefeleti xa die nan na ki.

<sup>34</sup> Someri xa die nan ya: Axi, Roga, Xuba, nun Arami.

<sup>35</sup> Someri xunya Helemi xa die nan ya: Sofaxa, Yimena, Selesi, nun Amali.

<sup>36</sup> Sofaxa xa die nan ya: Suwa, Xaraneferi, Suwali, Beri, Yimira,

<sup>37</sup> Beteseri, Hodo, Saama, Silesa, Yitiran, nun Beera.

<sup>38</sup> Yeteri xa die nan ya: Yefune, Pisepa, nun Ara.

<sup>39</sup> Ula xa die nan ya: Ara, Xaniyeli, nun Risiya.

<sup>40</sup> Aseri xa die nan na ki, mang'ee, mixi xungbee, soorie gbangbalanyie, mang'edie nan nu e ra e xabilee ya ma, naxee konti siga han mixi wulu moxojen nun senni.

## 8

### *Bunyamin xa die*

<sup>1</sup> Bunyamin xa die nan ya: Bela, a xa di singe, Asibeli, a xa di firin nde, Axara, a xa di saxan nde,

<sup>2</sup> Noxa, a xa di naani nde, nun Rafa, a xa di suuli nde.

<sup>3</sup> Bela xa die nan ya: Adari, Gera, Abihudi,

<sup>4</sup> Abisuwa, Naaman, Axowa,

<sup>5</sup> Gera, Sefufani, nun Xurami.

<sup>6</sup> Exudu xa die nan ya, naxee findi xabile mang'ee ra:

<sup>7</sup> Naaman, Ahiya, nun Gera. Singe e nu na Geba, kono Gera naxa e xanin Manaxati. Gera naxa Usa nun Axixudi soto.

<sup>8</sup> Saxarayimi to mee a xa gin'ee Xusimi nun Baara ra, a naxa die soto Mowaba boxi ma.

<sup>9</sup> A xa gin'ee Xodesi xa die nan ya: Yobabo, Sibiya, Mesa, Malakama, Yeyusi, Sakiya, nun Mirima.

<sup>10</sup> A xa die nan na ki naxee findi xabile mang'ee ra.

11 A xa giñe Xusimi xa die nan ya: Abitubu nun Elipaali.

12 Elipaali xa die nan ya: Eberi, Misami, nun Semedi, naxan Ono, Lodi, nun e rabilinyi tixi.

13 Beriya nun Sema, naxee findi Ayalon xabile mang'ee ra, naxa Gatikae keru.

14 Beriya xa mixie nan ya: Axiyo, Sasaki, Yeremoti,

15 Sebadaya, Aradi, Ederi,

16 Mikayeli, Yisepa, nun Yoxa.

17 Elipaali xa die nan ya: Sebadaya, Mesulama, Xisiki, Xeberi,

18 Yisemerayi, Yisiliya, nun Yobabo.

19 Simeyi xa die nan ya: Yakimi, Sikiri, Sabidi,

20 Eliyenayi, Siletayi, Eliyeli,

21 Adaya, Beraya, nun Simirati.

22 Sasaki xa die nan ya: Yisepan, Eberi, Eliyeli,

23 Abadon, Sikiri, Xanan,

24 Xananiya, Elama, Antotiya,

25 Yifideya, nun Penuweli.

26 Yeroxama xa die nan ya: Sameserayi, Sexaraya, Atalaya,

27 Yaaresiya, Eliya, nun Sikiri.

28 Darisalamu xabile mang'ee nan na ki.

29 Gabayon baba Yeyiyeli sabati Gabayon ñe. A xa giñe xili Maaka.

30 A xa die nan ya: Abadon, a xa di singe, Suru, Kisu, Bali, Neri, Nadabo,

31 Gedori, Axiyo, Sekeri,

32 nun Mikiloti, naxan findi Simeyami baba ra. E fan sabati Darisalamu ñe e bari mixie ya ma.

<sup>33</sup> Neri naxa Kisu soto. Kisu naxa Solu soto. Solu xa die nan ya: Yonatan, Malakisuwa, Abinadabo, nun Esibaali.

<sup>34</sup> Yonatan xa di xili Meribaali. Meribaali naxa Mike soto.

<sup>35</sup> Mike xa die nan ya: Piton, Meleki, Tareya, nun Axasi.

<sup>36</sup> Axasi naxa Yehowada soto. Yehowada xa die nan ya: Alemeti, Asamafeti, nun Simiri.

<sup>37</sup> Simiri naxa Mosa soto. Mosa naxa Bineya soto. Bineya naxa Rafa soto. Rafa naxa Eleyasa soto. Eleyasa naxa Aseli soto.

<sup>38</sup> Aseli xa die nan ya: Asirikama, Bokeru, Sumayila, Seyaraya, Abadiyasi, nun Xanan. Aseli xa die nan na ki.

<sup>39</sup> Aseli xunya Eseka xa die nan ya: Ulami, a xa di singe, Yeyusu, a xa di firin nde, nun Elifeleti a xa di saxan nde.

<sup>40</sup> Ulami xa die sɔɔri gbangbalanyie nan nu e ra. E fata xali ra. E xa die nun mamadie wuya e konti sigama han mixi keme tongo suuli. Bunyamin bɔnsɔɛ nan e birin na.

## 9

### *Darisalamukae*

<sup>1</sup> Isirayilakae xilie birin sɛbɛxi Isirayila mangɛe xa buki nde kui.

<sup>2</sup> Yuda bɔnsɔɛ nu bara siga konyiya kui Babilɔn bɔxi ma e xa yanfanteya xa fe ra. Naxee singe gbilen sabatide e xɔnyi Isirayila bɔxi ma, e findi Isirayila sɛrɛxɛdubɛɛ, Lewikae, nun mixie nan na, naxee walima Ala xa hɔrɔmɔbanxi kui.

<sup>3</sup> Yuda bənsəe, Bunyamin bənsəe, Eframi bənsəe, nun Manasi bənsəe mixi ndee naxa sabati Darisalamu.

<sup>4</sup> Yuda bənsəe xa mixi, naxee sabati Darisalamu, findi Utayi nan na, Amixudi xa di, Omeri xa di, Imiri xa di, Bani xa di, Peresi xa di, Yuda xa di.

<sup>5</sup> Siloka naxee sabati naa, nee findi Asaya nan na, di singe, nun a xa die.

<sup>6</sup> Sera xa di naxee sabati naa, nee findi Yuweli, nun a ngaxakerenyie nan na, mixi keme senni, mixi tongo solomanaani.

<sup>7</sup> Bunyamin xa di naxee sabati naa, nee nan ya: Mesulama xa di Salu, Hasenuwa xa di, Hodafiya xa di,

<sup>8</sup> a nun Yeroxama xa di Yibineya, a nun Usi xa di Ela, Mikiri xa di, a nun Sefataya xa di Mesulama, Reyuweli xa di, Yibiniya xa di,

<sup>9</sup> a nun e ngaxakerenyie e xabile ki ma, mixi keme solomanaani, mixi tongo suuli nun senni.

<sup>10</sup> Serexedube naxee sabatixi Darisalamu, nee nan ya: Yedaya, Yehoyaribu, Yakin,

<sup>11</sup> Xilikiya xa di Asaraya, Mesulama xa di, Sadoki xa di, Merayoti xa di, Axituba xa di, naxan findi Ala xa hərəməbanxi wali xunyi ra,

<sup>12</sup> Yeroxama xa di Adaya, Pasura xa di, Malakiya xa di, Masayi xa di, Adiyeli xa di, Yasera xa di, Mesulama xa di, Mesilemiti xa di, Imeri xa di,

<sup>13</sup> a nun e ngaxakerenyie, e denbaya xunyi, mixi wulu keren, keme solofere tongo senni. E birin findi kuntigie nan na, naxee walima Ala xa hərəməbanxi kui.

14 Lewi bənsəe mixi naxee sabatixi Darisalamu, nee nan ya: Xasubu xa di Semaya, Asirikama xa di, Xasabiya xa di, Merarika,

15 a nun Bakibakari, Xeresi, Galali, Mataniya, Mika xa di, Sikiri xa di, Asafi xa di,

16 a nun Semaya xa di Abadiyasi, Galali xa di, Yedutun xa di, a nun Asa xa di Berekiya, Elekana xa di, naxan sabatixi Netofakae xa taae kui.

17 Ala xa hərəməbanxi naade makantee nan ya: Salumu, naxan findi e xunyi ra, Akubu, Talamən, Aximan, a nun e ngaxakerenyie.

18 Salumu bənsəe nan naade makanta wali rabafe han to hərəməbanxi sogetede biri ra. Naade naxan xili «Mang'ee naade.» E benbae findi ne naade makantee ra Lewikae be.

19 Salumu, Kore xa di, Ebiyasafi xa di, Kora xa di, a nun a ngaxakerenyi naxee findi naade makantee ra, naxa Alatala xa hərəməlingira kanta alə e babae singe a raba ki naxe.

20 Finexasi, Eleyasari xa di, nu findixi naade makantee xunyi nan na. Alatala nu na a seeti ma.

21 Meselemiya xa di Sakari nu bara findi Kiri Banxi Naralande naade makante ra.

22 Mixi keme firin, fu nun firin nu bara sugandi na wali rabade. E xili birin sebexi a nun taa xilie e sabatixi dennaxe. Dawuda nun Annabi Samuweli nu bara na wali so e yi ra.

23 E tan nun e xa die naxa Alatala xa hərəməlingira naade kanta.

24 Naade makante ndee nu tixi sogetede, sogegode, koola, nun yirefanyi ma.

25 E ngaxakerenyi naxee nu na taae kui, e nu fama e malide xi solofere bun ma.

<sup>26</sup> Naade makante kuntigie Lewikae, naxa yiree kanta Ala xa hōromōbanxi kui naafuli nu ragataxi dennaxe.

<sup>27</sup> E nu xima Ala xa hōromōbanxi rabilinyi ne alako e xa menni makanta, a nun e xa naadee rabi gēēsege.

<sup>28</sup> Lewika ndee nu yirabasee ragatama, e nu e ramini loxo yo loxo, e man nu e konti.

<sup>29</sup> Booree nu yirabasee ragata, naxee nu na yire seniyeŋxi, a nun farin, weni, ture, surayi, nun se joxunmēe.

<sup>30</sup> Serexedubee xa die nu labundee masunbu.

<sup>31</sup> Salumu xa di Matitiya Lewika, naxan keli Kora xabile ya ma, nu taami ganma naxan nu bama serexe ra.

<sup>32</sup> E ngaxakerenyi ndee, Kehati bōnsōe ya ma, nu taami dōxoma teebili ra malabui loxōe birin.

<sup>33</sup> Bēetiba naxee findi Lewi xabilee xunyie ra, nu sabatixi Ala xa hōromōbanxi yigiyadee kui. Wali gbete yo mu nu na e yi ra, barima e findi wali birin xunyi nan na. E nu walima kōe nun yanyi.

<sup>34</sup> Lewi xabilee xunyie nan na ki, naxee sabatixi Darisalamu.

### *Solu bōnsōe*

*(Isirayila Mang'ee I 8:29-38)*

<sup>35</sup> Gabayon baba Yeyiyeli nu sabatixi Gabayon taa nan kui. A xa gine xili Maaka.

<sup>36</sup> A xa di nan ya: Abadon, a xa di singe, Suru, Kisu, Bali, Neri, Nadabo,

<sup>37</sup> Gedori, Axiyo, Sakari, nun Mikiloti.

<sup>38</sup> Mikiloti naxa Simeyami soto. E nu sabatixi e ngaxakerenyie fe ma Darisalamu.



<sup>39</sup> Neri naxa Kisu soto. Kisu naxa Solu soto. Solu xa die nan ya: Yonatan, Malakisuwa, Abinadabo, nun Esibaali.

<sup>40</sup> Yonatan naxa Meribaali soto. Meribaali naxa Mike soto.

<sup>41</sup> Mike xa die nan ya: Piton, Meleki, Tareya, nun Axasi.

<sup>42</sup> Axasi naxa Yara soto. Yara xa die nan ya: Alemeti, Asamafeti, nun Simiri. Simiri naxa Mosa soto. Mosa naxa Bineya soto.

<sup>43</sup> Bineya naxa Refaya soto. Refaya naxa Eleyasa soto. Eleyasa naxa Aseli soto.

<sup>44</sup> Aseli xa di senni nan ya: Asirikama, Bokeru, Sumayila, Seyaraya, Abadiyasi, nun Xanan. Aseli xa die nan na ki.

## 10

### *Mang'e Solu xa faxe* (*Samuweli I 31:1-13*)

<sup>1</sup> Filisitakae naxa Isirayilakae gere. Isirayilakae naxa e gi, a gbegbe naxa faxa Gilibowa geya fari.

<sup>2</sup> Filisitakae naxa bira Solu nun a xa die foxo ra, han e Yonatan, Abinadabo, nun Malakisuwa faxa.

<sup>3</sup> Gere naxa xoxoxo. Tanbe nde naxa Solu soxo a jaaxi ra.

<sup>4</sup> A naxa a fala a xa geresose maxaninyi be, «N faxa i xa santidegema ra, alako yi gaantaree naxa n nayaagi.» Kono na xeme mu suusa na rabade. Na na a ra, Solu naxa a yete faxa a xa santidegema ra.

<sup>5</sup> A xa geresose maxaninyi to na to, a fan naxa a yete faxa.

<sup>6</sup> Sölu nun a xa di saxanyi faxa na ki nɛ. A xa denbaya birin naxa laaxira temui keren.

<sup>7</sup> Isirayilakae, naxee nu sabatixi geya lanbanyi, e to a kolon a soorie na e gife, Sölu nun a xa die bara faxa, e fan naxa e gi. Filisitakae e xa taee birin soṭo na ki nɛ.

<sup>8</sup> Na kuye iba, Filisitakae naxa gbilen gere yire, e xa soori faxaxie harige tongo. E naxa Sölu nun a xa die to Gilibowa geya fari.

<sup>9</sup> E to gɛ e xa harige tongode, e naxa Sölu xunyi nun a xa geresosee xanin soorie yire. E naxa na xibaarui masen Filisitakae birin bɛ, a nun e xa kuyee bɛ.

<sup>10</sup> E naxa Sölu xa geresosee lu e xa ala xa banxi kui, e a xunyi gbaku e xa ala Dagɔn xa banxi kui.

<sup>11</sup> Yabesikae, naxee na Galadi, e to a mɛ Filisitakae naxan nabaxi Sölu ra,

<sup>12</sup> e naxa siga e sa Sölu nun a xa die furee tongo, e fa e ragata Yabesi terebinti wuri bun ma Galadi. Yabesikae naxa sunyi suxu xi solofere.

<sup>13</sup> Sölu faxa a xa yanfanteya nan ma fe ra a naxan niya Alatala ra. A mu Alatala xa woyenyi suxu, a naxa marasi fen mixie ra naxee woyenma mixi faxaxie ra.

<sup>14</sup> A mu marasi fen Alatala ra, na na a ra Alatala naxa a faxa, a Sölu xa mangeya fi Yisayi xa di Dawuda ma.

## 11

*Dawuda findife Isirayila mang'e ra  
(Samuweli II 5:1-10)*

<sup>1</sup> Isirayilakae birin naxa a masen Dawuda bɛ Xebiron, «Won wuli keren, fase keren.

<sup>2</sup> Hali Mangɛ Sɔlu xa waxati i tan nan nu Isirayila rapɛɛma. I Marigi Alatala naxa a masen i bɛ, «I xa n ma pama Isirayila rapɛɛ, i xa findi e xa yarerati ra.»»

<sup>3</sup> Isirayila forie birin naxa siga a fɔxɔ ra Xebiron. Dawuda naxa saatɛ xiri e tagi Alatala ya i. E naxa ture sa a xunyi ma Isirayila mangɛ ki ma, alɔ Alatala nu bara a masen Annabi Samuweli bɛ ki naxɛ.

<sup>4</sup> Mangɛ Dawuda nun Isirayilakae naxa siga Darisalamu, naxan man nu xili Yebusu, barima Yebusu bɔnsɔɛ nu sabatixi naa.

<sup>5</sup> E naxa a fala Dawuda bɛ, «I mu soma be feo.» Kɔnɔ Dawuda naxa nɔ Siyon yire makantaxi masɔtɔde. Na kui e menni xili fala Dawuda xa taa.

<sup>6</sup> Dawuda nu bara a fala, «Naxan singe na Yebusu gere, n na kanyi findima nɛ mangɛ ra.» Seruya xa di Yowaba singe nan gere so, a fa findi sɔɔrie xa mangɛ ra.

<sup>7</sup> Dawuda naxa sabati na yire makantaxi kui, na na a ra naa xili naxa fala Dawuda xa taa.

<sup>8</sup> Dawuda naxa menni nun a rabilinyi yailan. Yowaba fan naxa wali gbete raba Darisalamu alako naa xa fan.

<sup>9</sup> Dawuda senbɛ nu luma gbo ra, barima a nun Mangɛ Alatala nan nu a ra.

<sup>10</sup> Dawuda xa sɔɔri xunyi, naxee bara a mali Isirayila mangɛya sɔtɔde, alɔ Alatala nu bara a masen ki naxɛ,

<sup>11</sup> na sɔɔri gbangbalanyie xilie nan ya: Xaki-moni xa di Yasobeyami, naxan findi e xunyi ra. A nu bara mixi kɛmɛ saxan faxa tanbɛ ra gere keren kui.

<sup>12</sup> A firin nde findi Dodayi xa di Eleyasari nan na, Axowaka. A nu na Dawuda xa senbema saxanyie ya ma.

<sup>13</sup> A nu bara Dawuda mali Filisitakae gere de Pasi Damimi. A xa soorie naxa e gi Filisitakae ma, mengi xe nu dennaxe.

<sup>14</sup> Kono Eleyasari naxa lu naa han a Filisitakae bonbo Alatala xa mali ra.

<sup>15</sup> Yarerati saxan, Dawuda xa yarerati tongo saxanyie ya ma, naxa siga Dawuda yire Adulama fonme ra. Filisitakae nu tixi Refa gulunba kui.

<sup>16</sup> Na waxati Dawuda nu sabatixi yire makan-taxi, Filisitakae nu sabatixi Beteleemu mabiri.

<sup>17</sup> Dawuda naxa a sago nde fala, «A xoli n ma n xa Beteleemu kolonyi ye min.»

<sup>18</sup> Na soori yarerati saxanyie naxa Filisitakae xa naaninyi igiri, e sa ye ba kolonyi ra naxan na Beteleemu naade ra. E to fa na ye ra Dawuda be, a naxa tondi a minde. A naxa a ifli boxi ma serexe ra Alatala be.

<sup>19</sup> A naxa a fala, «Ala xa n natanga na ma. N mu noma yi ye minde, n ma xemee naxan sotoxi n be e nii sare ra. Na luma alo e nii tide mu gbo n be.» Na kui a naxa tondi na ye minde a xa senbema saxanyie naxan soto a be.

<sup>20</sup> Yowaba ngaxakerenyi Abisayi nan nu findixi na senbema saxanyie xunyi ra. A nu bara xeme keme saxan faxa a xa tanbe ra. A naxa xili xungbe soto na xeme saxanyie ya ma.

<sup>21</sup> E naxa a binya, e a findi e xa mangɛ ra, kono a mu lu e ya ma.

<sup>22</sup> Yehoyada xa di Benaya Kabaseelika nu findixi soori magaaxuxi nan na. A nu bara

fe xungbe gbegebe raba, alo Ariyeli Mowabaka firinyi faxafe. A man naxa yete nde faxa kolonyi kui balabalanyi temui.

<sup>23</sup> Loxoe nde a naxa Misiraka gbangbalanyi nde faxa, naxan xa maiteya kanke ya firin lima. Tanbe belebele nu na na Misiraka yi ra, naxan gbo alo dugi soxo wuri. Benaya naxa na ba a yi ra, a a faxa a yete xa tanbe ra.

<sup>24</sup> Yehoyada xa di Benaya xa fe xungbe nan na ki. A xili gbo na senbema saxanyi ya ma.

<sup>25</sup> A naxa binye soto dangi na xeme tongo saxan na, kono a senbe mu nu gbo na senbema saxanyie be. Dawuda xa gundo soori nan nu a ra.

<sup>26</sup> Senbema gbetee nan ya: Yowaba xunya Asaheli, Dodo xa di Elexanan Beteleemuka,

<sup>27</sup> Samoti Harorika, Xeleli Pelonka,

<sup>28</sup> Ikesi xa di Ira Tekowaka, Abiyeseri Anatotika,

<sup>29</sup> Sibekayi Xusaka, Ilayi Axowaka,

<sup>30</sup> Maharayi Netofaka, Baanna xa di Xeleda Netofaka,

<sup>31</sup> Ribayi xa di Itayi, naxan keli Gibiya Bunyamin bonsoe xa boxi ma, Benaya Piratonka,

<sup>32</sup> Xurayi naxan keli Gaasi gulunba yire, Abiyeli Arabaka,

<sup>33</sup> Asamafeti Baxurimika, Eliyaba Saalabonka,

<sup>34</sup> Hasemi xa die Gisonkae, Saage xa di Yonatan Hararaka,

<sup>35</sup> Sakara xa di Axiyama Hararaka, Uru xa di Elifala,

<sup>36</sup> Xeferi Mekeraka, Ahiya Pelonka,

<sup>37</sup> Xesero Karemeleka, Esibayi xa di Naarayi,

38 Natan ngaxakerenyi Yoweli, Hagari xa di Mibixari,

39 Sɛlɛki Amonika, Naxarayi Berotika, Seruya xa di Yowaba xa geresose xaninma,

40 Ira nun Garebe Yatirikae,

41 Uriya Xitika, Axalayi xa di Sabadi,

42 Siisa xa di Adina Rubenkae xa mangɛe nun a xa mixi tongo saxan,

43 Maaka xa di Xanan, Yosafati Mitinika,

44 Usiya Asatarotika, Xotama xa die Saama nun Yeyiyeli Arowerikae,

45 Simiri xa die Yediyayeli, Yoxa xunya Tisika,

46 Eliyeli Maxawika, Eliyeli xa die Yeribayi nun Yosawiya, Itima Mowabaka,

47 Eliyeli, Obedo, nun Yaasiyeli Mesobaka.

## 12

### *Sɔɔri gbɛtɛɛ birafe Dawuda fɔxɔ ra*

1 Sɔɔrie nan ya naxee siga Dawuda yire Sik-ilaga, alako e xa a mali gere sode. Na waxati Dawuda mu nu na Kisu xa di Sɔlu fɛ ma.

2 Bunyamin bɔnsɔɛ nan nu e ra, Sɔlu ngaxakerenyie. E nu fata tanbɛ nun gɛmɛɛ wolide e yirefanyi nun e kɔɔla bɛlɛxɛ ra.

3 E xilie nan ya: Mangɛ Axiyeseri, Semaa xa die Yowasi Gibiyaka, Asamafeti xa die Yesiyeli nun Pɛleti, Beraka nun Yehu Anatɔtika,

4 Yisemaya Gabayonka, naxan findi sɔɔri xungbe ra na sɔɔri tongo saxan ya ma, a fan findi e xa mangɛe nan na,

5 Yeremi, Yaxasiyeli, Yoxanan, nun Yosabadi Gederaka,

<sup>6</sup> Elusayi, Yerimoti, Beyalaya, Semaraya, Sefataya Xarufuka,

<sup>7</sup> Elekana Koraka, Yisiya Koraka, Asareli Koraka, Yoweseri Koraka, Yasobeyami Koraka,

<sup>8</sup> nun Yeroxama Gedorika xa die Yowela nun Sebadaya.

<sup>9</sup> Soori gbangbalanyi Gadika ndee naxa siga Dawuda yire wula i. Nee fata gere ra, geresose nu na e yi ra alo kanke makantase nun tanbe. E senbe nu gbo alo yetee, e xulun alo xeli naxee e gima geyae fari.

<sup>10</sup> E xilie nan ya: Eseri, e xunyi, Abadiyasi, a firin nde, Eliyabi, a saxan nde,

<sup>11</sup> Misemanna, a naani nde, Yeremi, a suuli nde,

<sup>12</sup> Atayi, a senni nde, Eliyeli, a solofere nde,

<sup>13</sup> Yoxanan, a solomasaxan nde, Elesabada, a solomanaani nde,

<sup>14</sup> Yeremi, a fu nde, a nun Makabanayi, a fu nun keren nde.

<sup>15</sup> Gadikae nan yi ki naxee findi soori xungbee ra. Naxan xurun e ya ma, a senbe gbo mixi keme be. Naxan xungbo e ya ma, a senbe gbo mixi wulu be.

<sup>16</sup> Nee naxa Yuruden xure giri a rafexi temui naxe, kike singe, e fa geya lanbanyi mixie keru sogetede nun sogorode mabiri.

<sup>17</sup> Bunyaminka nun Yudayaka ndee naxa siga Dawuda xa yire makantaxi.

<sup>18</sup> Dawuda naxa e ralan, a a fala e be, «Xa wo faxi boɓesa nan kui alako wo xa n mali, won boɓee findima keren nan na. Kono xa a sa a li wo faxi n yanfade n yaxuie nan be, n tan naxan

mu fe jaaxi yo rabaxi, won benbae Marigi Ala kiiti sama nɛ.»

<sup>19</sup> Na temui Alatala Xaxili Seniyenxi naxa goro Amasayi ma, naxan findi soori tongo saxan xunyi ra. A naxa a fala,

Ala xa Yisayi xa di Dawuda mali,

Ala xa boɲesa fi a ma,

Ala xa boɲesa fi Dawuda malima ma,

barima Ala nan Dawuda malixi.

Na kui Dawuda naxa e rasene, e xa lu a xa soori mangɛe ya ma.

<sup>20</sup> Manasi soori ndee nu bara e sa Dawuda de ra a nu wama kafufe Filisitakae ma temui naxe Solu gere. E nun Dawuda mu no Filisitakae malide barima Filisita mangɛ ndee nu bara gaaxu, e fa a fala, «Dawuda fama nɛ won yanfade, a kafu a marigi Solu ma, e won gere.»

<sup>21</sup> E to na fala, Dawuda naxa gbilen Sikilaga. Manasika naxee nu biraxi a foxo ra, e xilie nan ya: Adena, Yosabadi, Yediyayeli, Mikayeli, Yosabadi, Elihu, nun Siletayi. Soori wulu keren mangɛ nan nu na e birin na.

<sup>22</sup> E nu Dawuda malima a xa soorie raperede, barima e birin fata soorija rabade. Singe, e nu Isirayila soorie nan naperema.

<sup>23</sup> Loxo yo loxo Dawuda malimae xun nu masama han a xa soori gali naxa lu alo Ala gbe.

<sup>24</sup> Soori xasabi nan ya naxee fa Xebiron Dawuda yire, alako e xa Dawuda mali, Solu xa mangɛya xa radangi a ma alo Alatala nu bara a masen ki naxe:

<sup>25</sup> Yudayakae, soori wulu senni keme solo-masaxan. Geresose nu na e birin yi ra.



<sup>26</sup> Simeyɔnkae, sɔɔri gbangbalanyie wulu solofere sɔɔri keme.

<sup>27</sup> Lewikae, sɔɔri wulu naani keme senni.

<sup>28</sup> Yehoyada, naxan findi yarerati ra Haruna ɲɔxɔe ra, a nun a xa sɔɔri wulu saxan keme solofere.

<sup>29</sup> Sadɔki, segetala sɔɔri gbangbalanyi, nun a xabile kuntigie, mixi mɔxɔɲen nun firin.

<sup>30</sup> Bunyaminkae, Solu bɔnsɔe, sɔɔri wulu saxan. E mu nu gbo barima a gbegbe nu na Solu nan ma seeti.

<sup>31</sup> Eframikae, sɔɔri wulu mɔxɔɲen keme solomasaxan. E birin sɔɔri gbangbalanyi naxee benbae xili nu gbo.

<sup>32</sup> Manasikae, sɔɔri wulu fu nun solomasaxan. E tan nan nu sugandixi mangɛya radangife ra Dawuda ma.

<sup>33</sup> Isakarikae, kuntigi keme firin nun e xa mixi naxee nu na e xa yaamari bun ma. E fan nu bara a kolon Isirayila lan a xa naxan naba na waxati.

<sup>34</sup> Sabulonkae, sɔɔri wulu tongo suuli. E redixi gere xili ma, geresose nu na e yi ra.

<sup>35</sup> Nafatalikae, sɔɔri xunyi wulu keren, a nun sɔɔri wulu tongo saxan nun solofere. Wure lefa nun tanbe nu na e birin yi ra.

<sup>36</sup> Danakae, sɔɔri wulu mɔxɔɲen nun solomasaxan keme senni. Geresose na e birin yi ra.

<sup>37</sup> Aserikae, sɔɔri wulu tongo naani. E birin redixi.

<sup>38</sup> Sɔɔri naxee keli Yuruden naakiri ma sogetede biri, nee findi Rubenkae, Gadikae, nun Manasikae nan na, e lan mixi wulu keme mɔxɔɲen nan ma. Geresosee na e birin yi ra.

<sup>39</sup> Yi sɔɔrie fa ne Xebiron alako e xa Dawuda

dɔxo mange ra Isirayila xun na. Na janige nan nu na e be. Isirayilakae birin nu bara na nate tongo.

<sup>40</sup> E naxa lu mɛnni Dawuda yire xi saxan e e degema, e e minma. E ngaxakerenyie nan nu na donse rafalama e be.

<sup>41</sup> E dɔxoɔbooree fan naxa fa donse ra kelife ra Isakari bɔxi, Sabulon bɔxi, nun Nafatali bɔxi ma. E naxa fa na ra sofalee, ɲoxomɛe, soee, nun ningee fari. E naxa fa kote mɔoli birin na alo donse, farin, xɔre xaraxi, weni bogi xaraxi, weni, ture, xuruse lanma nun a xungbe. E naxa fa a gbegbe ra barima Isirayilaka birin nu seɛwaxi.

## 13

*Dawuda saate kankira xaninfe Darisalamu.  
(Samuweli II 6:1-11)*

<sup>1</sup> Dawuda naxa soori wulu xunyie, soori kemɛ xunyie, nun kuntigi birin xili, e xa malan.

<sup>2</sup> Dawuda naxa a fala Isirayila ɲama birin be, «Xa a findixi fe fanyi nan na, xa a kelixi won Marigi Alatala nan ma, won xa xɛerae xɛɛ won ngaxakerenyie ma, naxee na Isirayila bɔxie ma. Won xa serɛxɛdubɛɛ nun Lewikae fan xili, naxee na Isirayila taae kui, alako won birin xa lu yire keren.

<sup>3</sup> Won xa won Marigi xa saate kankira ragbilen won yire, barima Solu xa mangɛya waxati, won mu siga a foxo ra.»

<sup>4</sup> ɲama birin naxa tin na fe fanyi ra.

<sup>5</sup> Dawuda naxa Isirayila birin malan, keli Sixori xure ma Misira bɔxi, sa dɔxo Xamata ra,

alako e xa Ala xa saate kankira tongo Kiriyati Yeyarimi.

<sup>6</sup> Dawuda nun Isirayila birin naxa te Baala Yudaya bɔxi ma, dennaxe xili Kiriyati Yeyarimi. E nu wama Ala xa saate kankira tongofe. Alatala xa kibanyi nu na maleke sawure firin tagi na kankira fari, Alatala maxandima dennaxe.

<sup>7</sup> E naxa Ala xa saate kankira tongo Abinadabo xɔnyi, e a dɔxɔ kote xanin se nɛɛɛ kui. Usa nun Axiyo naxa a ragi.

<sup>8</sup> Dawuda nun Isirayilakae naxa seewa ki fanyi Ala ya xɔri. E naxa beɛti ba kɔrae, maxasee, nun sarae xui ra.

<sup>9</sup> E to lɔnyi li e dennaxe ma Kidon, ninge naxee nu kote xanin se mabɛndunma, naxa salaxun e wa birafe. Usa naxa saate kankira suxu a belexe ra alako a naxa bira.

<sup>10</sup> Alatala naxa xɔnɔ Usa ma, a a faxa keren na, barima a mu nu lan a xa a belexe din saate kankira ra. Usa faxa na ki nɛ Ala ya xɔri.

<sup>11</sup> Dawuda naxa xɔnɔ Usa faxafe ma. Menni xili naxa sa «Usa gbaloe.» Han ya na xili saxi naa xun.

<sup>12</sup> Dawuda naxa gaaxu Ala ya ra na lɔxɔɛ. A naxa a yete maxɔrin, «N Ala xa saate kankira rasoma n xɔnyi di?»

<sup>13</sup> Na lɔxɔɛ Dawuda mu saate kankira xanin a xɔnyi Darisalamu. A naxa a raso Obedo Edon xa banxi kui, naxan na Gati.

<sup>14</sup> Ala xa saate kankira naxa lu Obedo Edon xa denbaya yire kike saxon. Alatala naxa barake sa e ma na xa fe ra.

*Dawuda xa denbaya*  
(*Samuweli II 5:11-16*)

<sup>1</sup> Tire mangɛ Xirami naxa mixie xɛɛ Dawuda xɔn ma alako e xa banxi belebele ti a tan Dawuda bɛ. E naxa sɛdiri wuri xanin e xun ma, a nun walikɛ naxee a rawalima.

<sup>2</sup> Dawuda naxa a kolon a Alatala yati nan a findixi Isirayila mangɛ ra. A a kolon Ala luma a xa mangɛya ite ra a xa pama xa fe ra.

<sup>3</sup> Dawuda naxa ginɛ gbɛtɛɛ dɔxɔ Darisalamu. E naxa di ginɛ nun di xɛmɛ bari a bɛ.

<sup>4</sup> A xa di naxee barixi Darisalamu, e xilie nan ya: Samuwa, Sobabo, Natan, Sulemani,

<sup>5</sup> Yibixari, Elisuwa, Elipeleti,

<sup>6</sup> Noga, Nefegi, Yafiya,

<sup>7</sup> Elisama, Beeliyada, nun Elifeleti.

*Filisitakae Dawuda gerefe*  
(*Samuweli II 5:17-25*)

<sup>8</sup> Filisitakae to a mɛ Dawuda bara findi Isirayila mangɛ ra, e naxa siga a gereɗe. Dawuda fan naxa mini e ya ra.

<sup>9</sup> Filisitakae naxa gere ti Isirayilakae bɛ naxee nu na Refa gulunba.

<sup>10</sup> Dawuda naxa Ala maxɔrin, «N xa siga Filisitakae gereɗe? I e sama n sagoe?» Alatala naxa a masen a bɛ, «Siga, n fama nɛ e sade i sagoe.»

<sup>11</sup> Dawuda nun a xa sɔorie naxa te Bali Perasimi, e fa Filisitakae bɔnbɔ. Na kui Dawuda naxa a fala, «Ala bara n yaxuie kana, alɔ ye gbegbe bogoni bɔɔma a ra ki naxɛ.» Na fe nan a toxi, Bali Perasimi xili falaxi yi yire xun.

<sup>12</sup> Filisitakae nu bara e xa kuyee lu gere yire. Dawuda naxa yaamari fi e xa gan.

<sup>13</sup> Filisitakae man naxa gere ti Isirayilakae be naxee nu na Refa gulunba.

<sup>14</sup> Dawuda man naxa Ala maxorin xa a lanma a xa e gere. Ala naxa a yaabi, «I naxa bira e foxo ra de. I xa e mabilin han wondi yire. I xa mame ti menni

<sup>15</sup> han i xa xui nde me wuri bilie kon na. Na temui i fa mini wondi kui e gere. N tan nan minima i ya ra, nee bonbo i be.»

<sup>16</sup> Dawuda naxa a raba alo Ala a masenxi a be ki naxe. E naxa Filisitakae bonbo kelife Gabayon, sa doxo Geseri ra.

<sup>17</sup> Na kui Dawuda xili naxa xungbo yire birin. Alatala naxa a niya si birin xa gaaxu Dawuda ya ra.

## 15

### *Ala xa saate kankira sigafe Darisalamu*

<sup>1</sup> Dawuda naxa banxie ti Darisalamu taa kui, dennaxe nu xili Dawuda xa taa. Menni a naxa kiri banxi ti Ala xa saate kankira luma dennaxe.

<sup>2</sup> Dawuda naxa yaamari fi a mixi yo mu Ala xa saate kankira maxaninma fo Lewikae, barima Alatala e tan nan sugandixi na ma. Na bara findi e xa wali ra temui birin.

<sup>3</sup> Dawuda naxa Isirayila birin xunlan Darisalamu Alatala xa saate kankira rasofe ra banxi kui naxan nu yailanxi na xa fe ra.

<sup>4</sup> Dawuda naxa Haruna xa die nun Lewikae malan:

<sup>5</sup> Kehati xa die, mixi keme mixi moxoren. E xunyi na Uriyeli nan na.

<sup>6</sup> Merari xa die, mixi keme firin mixi moxoren.

E xunyi na Asaya nan na.

<sup>7</sup> Gerison xa die, mixi kɛmɛ mixi tongo saxan.

E xunyi na Yoweli nan na.

<sup>8</sup> Elisafan xa die, mixi kɛmɛ firin.

E xunyi na Semaya nan na.

<sup>9</sup> Xebiron xa die, mixi tongo solomasaxan.

E xunyi na Eliyeli nan na.

<sup>10</sup> Yusiyeli xa die, mixi kɛmɛ mixi fu nun firin.

E xunyi na Aminadabo nan na.

<sup>11</sup> Dawuda naxa sɛrɛxɛdubɛɛ Sadɔki nun Abiy-atari, a nun Lewikae Uriyeli, Asaya, Yoweli, Semaya, Eliyeli nun Aminadabo xili.

<sup>12</sup> A naxa a fala e bɛ, «Wo tan nan na Lewi xa denbayae xunyiɛ ra. Wo wo yetɛ raseniyeɛn, wo tan nun wo xa mixie. Wo xa te wo Marigi Alatala xa saate kankira ra. Wo xa a xanin yire n dennaxe yailanxi a bɛ.

<sup>13</sup> Temui dangixi won Marigi Alatala nu bara xɔnɔ won ma, barima Lewikae nan nu lan e xa na xanin a seriye ki ma.»

<sup>14</sup> Sɛrɛxɛdubɛɛ nun Lewikae naxa e yetɛ raseniyeɛn beenu e xa te Isirayila Marigi Alatala xa saate kankira ra.

<sup>15</sup> Lewikae naxa Alatala xa saate kankira suxu wurie ma a xaninma naxee ra, e e sa e tunkie fari alɔ Alatala Annabi Munsa yamari ki naxe.

<sup>16</sup> Dawuda naxa a fala Lewikae xunyiɛ bɛ e xa bɛɛtiba ndee sugandi e xa mixie ya ma naxee bɛɛti bama kɔrae nun maxasee xui ra jɛlɛxinyi kui.

<sup>17</sup> Lewikae naxa Yoweli xa di Heman sugandi, a nun Berekiya xa di Asafi, nun Kusaya xa di Etani, naxan nu na Merari xa die ya ma.

<sup>18</sup> Lewikae gbetsee nan nu na naade kantsee ra: Sakari, Ben, Yasiyeli, Semiramoti, Yexiyeli, Unni, Eliyabi, Benaya, Maaseya, Matitiya, Elifelehu, Mikineyahu, Obedo Edon, nun Yeyiyeli.

<sup>19</sup> Lewika gbetsee nan nu na beetibae ra: Heman, Asafi, nun Etani. E nu maxasee raberema jalexinyi kui.

<sup>20</sup> Sakari, Asiyeli, Semiramoti, Yexiyeli, Unni, Eliyabi, Maaseya, nun Benaya nu korae raberema.

<sup>21</sup> Matitiya, Elifelehu, Mikineyahu, Obedo Edon, Yeyiyeli, nun Asasiya nu korae luuti solomasaxan daaxi raberema.

<sup>22</sup> Lewika Kenaniya naxa findi xunyi ra naxan Ala xa saate kankira xaninma. A nu na wali kolon.

<sup>23</sup> Berekiya nun Elekana nu a malima na wali kui.

<sup>24</sup> Serexedubee Sebanaya, Yosafati, Netaneeli, Amasayi, Sakari, Benaya, nun Eliyeseri nan nu sarae fema Ala xa saate kankira ya ra. Obedo Edon nun Yexiya nan nu saate kankira xaninyie ra.

<sup>25</sup> Dawuda, Isirayila forie, nun soori wulu xunyyie naxa ti kira xon alako e xa sa Alatala xa saate kankira mati jalexinyi kui kelife ra Obedo Edon xonyi.

<sup>26</sup> Ala naxa Lewikae mali a xa saate kankira xaninde. Na kui e nu bara tuura solofere nun yexee kontonyi solofere ba serexe ra.

<sup>27</sup> Dawuda, Lewika naxee saate kankira xaninma, beetibae, nun Kenaniya, beetibae xa mang'e, e birin nu maxirixi donma tofanyie kui. Dawuda naxa serexedube donma fan nagoro a

ma.

<sup>28</sup> Isirayilakae birin naxa te Alatala xa saate kankira ra ɲɛlexinyi kui. Ndee naxa ferie nun sarae fe, ndee naxa maxasee nun koraе rabere.

<sup>29</sup> Solu xa di ginε Mikala naxa Isirayilakae to Alatala xa saate kankira raso ra Dawuda xa taa kui. A to mangε Dawuda to fare boron na ɲɛlexinyi kui, a naxa mangε Dawuda rapaaxu.

## 16

### *Dawuda Ala tantufe*

<sup>1</sup> E to so Darisalamu, e naxa Ala xa saate kankira dɔxɔ hɔrɔmɔlingira kui, Dawuda naxan yailanxi a lude ra. E naxa serexe gan daaxi nun xanunteya serexe ba.

<sup>2</sup> Dawuda to ge na serexee bade, a naxa duba Isirayila pama be Alatala xili ra.

<sup>3</sup> Na xanbi a naxa taami, sube, nun donse ɲɔxunme so Isirayilakae birin yi ra.

<sup>4</sup> A Lewika naxee sugandi dubafe ra pama be, e Isirayila Marigi Alatala matɔxɔ, e a tantu a xa saate kankira ya ra. Nee xilie nan ya:

<sup>5</sup> Asafi, naxan findi e xunyi ra, Sakari, naxan na na xanbi ra, Yeyiyeli, Semiramoti, Yexiyeli, Matitiya, Eliyabi, Benaya, Obedo Edon, nun Yeyiyeli. Koraе nu na e yi ra, maxasee nu na Asafi yi ra.

<sup>6</sup> Serexedube Benaya nun Yaxasiyeli nu sarae fema Ala xa saate kankira ya ra.

<sup>7</sup> Na lɔxɔε Dawuda naxa yi beeti so Asafi nun a xa mixie yi ra alako e xa Alatala tantu.

<sup>8</sup> Wo Alatala matɔxɔ, wo a maxandi.

Wo a masen sie be a fe xungbe naxee rabaxi.



9 Wo beɛti ba a be, wo a tantu binye kui.  
Wo wo maɔɔxun a xa fe fanyie birin ma.

10 Wo a xili seniyenxi maɔɔɔ.  
Wo tan naxee na Alatala fenfe,  
seɛwe xa lu wo boɔɔe kui.

11 Wo xa bira Alatala nun a senbe foɔɔ ra.  
Wo wo ya rafindi a ma.

12 Wo wo ratu a xa kaabanakoe ma,  
a xa fe fanyie ma a naxee rabaxi,  
a nun a xa marasi.

13 Wo tan Isirayila bara findi a xa konyie ra.  
Yaxuba xa die, Alatala bara wo sugandi.

14 Alatala nan na won Marigi Ala ra,  
A tan nan kiiti sama boɔɔi birin ma.

15 Wo wo ratu a xa saate ma temui birin,  
a xa woɔyenyi ma abadan.

16 A na saate naxan tongo Iburahima be,  
a a kali Isiyaga be.

17 A na nan xirixi e nun Yaxuba tagi,  
a findi saate ra Isirayila be  
naxan mu kanama abadan.

18 Na saate nan ya:

«N Kanaan boɔɔi fima ne wo ma,  
a findi wo ke ra.»

19 Wo mu nu gbo,  
xoɔɔe nan nu wo ra na boɔɔi kui.

20 Wo to siga pamane gbeteɛ ma,  
wo naxa lu e xa mangeya bun ma,

21 Ala mu tin mixi yo xa wo paxankata.  
A naxa mangɛe rakoroɔsi wo xa fe ra,

22 «Wo naxa wo belexe din n ma mixi sugandixie  
ra,  
wo naxa n ma namijonmɛe tooro.»

- 23 Dunija birin xa beɛti ba Alatala be.  
Lɔxɔɛ birin wo xa a xa kisi xa fe masen.
- 24 Wo xa a xa fe fanyie tagi raba si gbɛtɛɛ be,  
wo xa a xa kaabanakoe masen dunija birin be.
- 25 Alatala senbe gbo, a lanma won xa a matɔxɔ.  
A magaaxu alae birin be.
- 26 Wule nan na si gbɛtɛɛ xa alae ra,  
kɔnɔ Alatala nan koore daaxi.
- 27 Nɔre xungbe na a yi ra,  
senbe nun sɛɛwe gbo a xɔnyi.
- 28 Si birin, wo xa Alatala matɔxɔ,  
wo xa a senbe kolon.
- 29 Wo xa a xili matɔxɔ,  
wo xa sɛrɛxɛɛ ba a be a xa hɔrɔmɔlingira kui,  
wo xa a batu seniyenyi kui.
- 30 Adama birin xa sɛrɛn a ya ra.  
Ala mu tinma dunija xun xa rakana.
- 31 Koore nun dunija xa sɛɛwa,  
birin xa a kolon Alatala nan mangɛ ra.
- 32 Baa nun yɛxɛɛɛ xa Ala senbe masen,  
bɔxi nun subee xa Ala xa fanyi masen.
- 33 Wondi wuri xa Alatala xili masen,  
naxan fafe dunija makiitide.
- 34 Wo xa Alatala tantu barima a fan,  
a xa xanunteya mu kanama abadan.
- 35 Wo xa a masen Ala be,  
«Ala, muxu rakisi,  
muxu ratanga si gbɛtɛɛ ma,  
alako muxu xa i xili matɔxɔ,  
na xa findi fe fanyi ra muxu be.
- 36 Tantui na Isirayila Marigi Alatala be temui  
birin.»

Nama naxa a ratin, «Tantui na Alatala be.»

<sup>37</sup> Dawuda naxa Asafi nun a xunyaɛ yamari e xa mɛɛni Alatala xa saate kankira ma temui birin.

<sup>38</sup> A naxa Yedutun xa di Obedo Edon, nun Xosa, a nun a xa mixi tongo senni nun solomasaxan yamari e xa hɔrɔmɔlingira naade kanta.

<sup>39</sup> Sɛrɛxɛdubɛ Sadɔki nun a xa mixie naxa lu Alatala xa hɔrɔmɔlingira naxan nu na Gabayon geya fari.

<sup>40</sup> A nu lan nɛ e xa sɛrɛxɛ gan daaxi ba gɛɛsɛgɛ nun nunmare temui Alatala bɛ alo a sɛbɛxi Isirayilakɛ bɛ kitaabui kui ki naxɛ.

<sup>41</sup> Heman, Yedutun, nun boore naxee nu sugandixi fan nu na alako e xa Alatala tantu, barima a xa fonisireya mu jɔnma abadan.

<sup>42</sup> Heman nun Yedutun nu sarae fema, e nu maxasee raberema alako e xa bɛɛti ba Alatala bɛ. Yedutun xa die nan nu na naade kantɛɛ ra.

<sup>43</sup> Na dangi xanbi, jama birin naxa siga e xɔnyi. Dawuda fan naxa gbilen a xɔnyi, a xa duba a xa denbaya bɛ.

## 17

### *Ala xa saate Dawuda bɛ (Samuweli II 7:1-17)*

<sup>1</sup> Dawuda to gɛ sabatide a xa banxi nɛɛnɛ kui, a naxa a fala Annabi Natan bɛ, «I bara a to, n na banxi tofanyi nan kui naxan yailanxi sediri wuri ra, kɔnɔ Alatala xa saate kankira tan na kiri banxi nan kui.»

<sup>2</sup> Annabi Natan naxa Dawuda yaabi, «I xa i waxɔnfe raba, barima wo nun Ala na a ra.»

<sup>3</sup> Na kɔɛ ra, Ala naxa a masen Annabi Natan bɛ,

<sup>4</sup> «Sa a fala n ma konyi Dawuda bɛ Alatala xa masenyi nan ya, <I tan mu banxi tima n bɛ n luma dennaxɛ.

<sup>5</sup> Kabi n Isirayila ramini Misira bɔxi kui han to, n na kiri banxi nan kui. Banxi gbɛtɛ yo mu nu na n yi ra.

<sup>6</sup> Muxu nun Isirayila xa jɛrɛ kui, n mu a fala n ma jama xa yarerati yo bɛ, n naxɛe sugandi e xa mɛɛni n ma jama ma, e xa banxi sɛdiri wuri daaxi ti n bɛ.>

<sup>7</sup> Yakɔsi i xa a masen n ma konyi Dawuda bɛ, <Mangɛ Alatala xa masenyi nan ya: I nu na gɔɔrɛ nɛ xuruse kantade, n naxa i findi n ma jama Isirayila xa mangɛ ra.

<sup>8</sup> I nu sigama dennaxɛ birin won birin nan nu a ra, n naxa i yaxuie halaki i ya ra, n naxa i xili rate alɔ mixi binye naxɛe na bɔxi fari.

<sup>9</sup> N bara yire nde sugandi n ma jama Isirayila bɛ e sabatima dennaxɛ, alako e naxa gaaxu sonɔn, tinxintaree xa e lu naa.

<sup>10</sup> N e malima nɛ alɔ n a raba ki naxɛ n to kiitisae dɔxɔ n ma jama Isirayila xun ma. N man na rabama i tan fan bɛ, i xa ti i yaxuie fari. N tan Alatala fama nɛ sɛnbɛ fide i ma a nun i xabile birin.

<sup>11</sup> I xa dunijɛigiri na kamali tɛmɛi naxɛ, i naxa gbilen i benbae yire, n mɛɛnima nɛ i xa die ma. N keren sugandima nɛ, a xa findi mangɛ ra i jɔxɔɛ ra.

<sup>12</sup> Na kanyi nan fama hɔrɔmɔbanxi tide n bɛ. N a rasabatima mangɛya kui, alako a xa bu abadan.

<sup>13</sup> N findima a baba nan na, a tan fan findima n ma di nan na. N ma fonisireya mu bama a yi ra alɔ n a ba ki naxɛ mangɛ singe yi ra.

14 N a findima n ma ɲama xa mangɛ nan na, a xa mangɛya mu kanama abadan.»

15 Annabi Natan naxa Ala xa masenyi ti Dawuda bɛ alɔ Ala a masenxi a bɛ ki naxɛ.

16 Na xanbi mangɛ Dawuda naxa siga, a sa a yɛtɛ dɛntɛgɛ Marigi Alatala bɛ, a a fala, «N Marigi Alatala, nde na n tan na a nun n ma denbaya ra naxan a niyama i xa yi nate mɔoli tongo muxu bɛ?

17 N Marigi Ala, i naxan falaxi i xa konyi xa denbaya xa fe ra, fe xuri mu a ra de! N Marigi Alatala i bara hinne n na alɔ mixi xungbe.

18 N tan Dawuda, n nɔma munse falade i bɛ yi xunnakeli xa fe ra i naxan fixi i xa konyi ma? I i xa konyi kolon.

19 Marigi Alatala, i bara yi nate tongo n bɛ i xa xanunteya xa fe ra alako dunɲa xa i senbɛ kolon.»

20 «Alatala, i maniye mu na, ala gbɛtɛ mu na ba i tan na. Muxu bara na kolon.

21 Si gbɛtɛ na dunɲa naxan luma alɔ Isirayila naxan Marigi a ramixi konyiya kui, a a findi a xa ɲama ra? I bara kaabanakoe raba, fe magaaxuxie. I bara sie keri i xa ɲama ya ra, i naxan naminixi Misira boxi ra, alako i xili xa kolon.

22 Marigi Alatala, i bara a ragiri Isirayila xa findi i xa ɲama ra, i fan bara findi e Marigi Ala ra. Na mu kanama abadan.»

23 «Marigi Alatala, i xa masenyi i xa konyi nun a xa denbaya xa fe ra, na xa kamali. I naxan fala, yandi i xa na ragiri.

24 I xa na ragiri alako i xili xa gbo tɛmui birin. Dunɲa xa a fala, <Mangɛ Alatala, Isirayila Marigi

Ala nan a ra.» I xa konyi Dawuda, nun a xa denbaya, i xa mæeni e ma abadan.

<sup>25</sup> N Marigi Ala, i bara i ñanige masen i xa konyi be a falafe ra i xa a xa denbaya xun nakeli. Na na a ra i xa konyi bara limaniya i maxandife ra.

<sup>26</sup> Alatala, i tan nan na Ala ra. I bara yi masenyi fanyi ti i xa konyi be.

<sup>27</sup> I bara wa i xa konyi xa denbaya barakafe, alako a xa balo i ya i abadan. Alatala barake sama naxan ma, na barake mu bama a yi ra abadan.»

## 18

### *Dawuda nola sofofe* (*Samuweli II 8:1-18*)

<sup>1</sup> Na to dangi, Dawuda naxa Filisitakae bonbo, a e rayaagi. A naxa Gati nun a rabilinyie ba e yi ra.

<sup>2</sup> A naxa Mowabakae fan bonbo, e fa lu a xa yaamari bun ma, e duuti ba.

<sup>3</sup> Dawuda naxa Soba mang'e Hadadeseri fan bonbo Xamata mabiri, barima a nu wama Efirati xure xa lu a xa yaamari bun ma.

<sup>4</sup> Dawuda naxa soori ragise wulu keren, soe ragi wulu solofere, nun soori wulu moxonen ba e yi ra. A naxa soe birin tore bolon fo soe keme jondon a naxee ragata a yete be.

<sup>5</sup> Siriyaka naxee na Damasi naxa fa Soba mang'e Hadadeseri malide, konjo Dawuda naxa soori wulu moxonen nun firin bonbo e ra.

<sup>6</sup> Dawuda naxa a xa soorie doxo Siriya boxi ma Damasi taa kui. Siriyakae naxa lu Dawuda xa

yaamari bun, e duuti ba a bɛ. Dawuda siga dɛdɛ, Alatala nu xunnakeli fima nɛ a ma.

<sup>7</sup> Dawuda naxa Hadadeseri xa sɔorie xa wure lefa xanin Darisalamu xɛɛma masoxi naxee ma.

<sup>8</sup> A naxa Hadadeseri xa yɔxui gbegbe tongo Tibati nun Kunu. Sulemani naxa na yailan maxase xungbe ra, salide kontigibae, a nun sɛrɛxɛbade walisee ra naxee nu rawalima hɔrɔmɔbanxi kui.

<sup>9</sup> Xamata mangɛ Tohu naxa a mɛ a Dawuda bara Soba mangɛ Hadadeseri xa sɔorie birin bɔnbɔ.

<sup>10</sup> A naxa a xa di Hadorami xɛɛ mangɛ Dawuda xɔn, a xa a xɛɛbu a bɛ, a man xa a matɔxɔ a xa gere xa fe ra Hadadeseri mabiri ra. A man naxa xɛɛma, gbeti, nun yɔxui fi Dawuda ma, barima gere nu na Tohu nun Hadadeseri tagi.

<sup>11</sup> Mangɛ Dawuda naxa na birin fi Alatala ma, a nun gbeti nun xɛɛma a naxan nasuxu sie birin yi ra alɔ Edon, Mowaba, Amoni, Filisita, nun Amaleki.

<sup>12</sup> Seruya xa di Abisayi naxa Edonka wulu fu nun solomasaxan bɔnbɔ gulunba kui Fɔxɔɛ yire.

<sup>13</sup> A naxa sɔorie lu Edon alako naa birin xa lu Dawuda xa yaamari bun ma. Dawuda siga dɛdɛ, Alatala nu xunnakeli fima nɛ a ma.

<sup>14</sup> Dawuda naxa a xa pama Isirayila yamari seriye nun tinxinyi ra.

<sup>15</sup> Seruya xa di Yowaba nan nu na sɔorie xa mangɛ ra. Axiludu xa di Yehosafati nan nu na mangɛ xa xui madangi ra.

<sup>16</sup> Axituba xa di Sadɔki nun Abiyatari xa di Abimeleki nan nu na sɛrɛxɛdubɛɛ ra. Sawesa nan nu na mangɛ xa sebeliti ra.

<sup>17</sup> Yehoyada xa di Benaya nan nu na Keretikae nun Peletakae xunyi ra. Mangɛ Dawuda xa die nan nu na a xanbi ra.

## 19

### *Dawuda nun Amonikae xa gere (Samuweli II 10:1-19)*

<sup>1</sup> Na to dangi, naxan naba na nan yi ki. Amonikae xa mangɛ Naxasa naxa faxa, a xa di naxa ti a joxɔɛ ra.

<sup>2</sup> Dawuda naxa a mapoxun, «N fe fanyi rabama nɛ Naxasa xa di Xanun bɛ, barima a baba fe fanyi raba nɛ n bɛ.» Dawuda naxa xɛɛrae xɛɛ Xanun xɔn e xa sa a nu tɔɔɔ a nu sɛgɛ sa a baba jɔnfe ma. Dawuda xa xɛɛrae naxa so Amonikae xa bɔxi ma Xanun yire, e xa a nu tɔɔɔ sa.

<sup>3</sup> Kɔnɔ Amonikae xa kuntigie naxa a fala Xanun bɛ, «I joxɔ a ma Dawuda yee xɛɛxi i nu tɔɔɔ sade i baba jɔnfe nan ma? E faxi nɛ e xa fa be kolon, e xa be ya iso, e xa yi bɔxi tegerenya raba. A xa xɛɛrae faxi be na nan ma.»

<sup>4</sup> Na kui Xanun naxa Dawuda xa xɛɛrae suxu, a naxa e dɛ xabe maxaba, a naxa e xa donmae raxaba e xɔɛ yailanyi, a fa e rabɛnin.

<sup>5</sup> Mixi nde to na fe dentɛgɛ Dawuda bɛ, a naxa mixie xɛɛ a xa xɛɛrae yire a falafe ra, «Wo lu Yeriko han wo dɛ xabee xa mini. Na tɛmɛi wo xa gbilen be.» Dawuda xa xɛɛrae xaxili nu bara ifu ki fanyi ra.

<sup>6</sup> Xanun nun Amonikae to a kolon a e bara xɔnnanteya raso e nun Dawuda tagi, e naxa gbeti kilo wulu tongo saxan nun naani fi Siriyakae ma,



naxee nu na Mesopotamiya, Maaka nun Soba, alako e xa fa soori ragisee nun soe ragie ra e be.

<sup>7</sup> Na kui Maaka mange nun a xa pama naxa fa soori ragise wulu tongo saxan nun firin na, e fa malan Medeba. Amonikae fan naxa mini e xa taae kui, alako e xa Dawuda gere.

<sup>8</sup> Dawuda fefe na kolon, a naxa soori mange Yowaba nun a xa soori gbangbalanyi birin xee e yire.

<sup>9</sup> Amonikae naxa mini, e ti gere ki ma taa sode de ra. Mange naxee fa e malide, e nu tixi e xati ma daaxa i.

<sup>10</sup> Yowaba naxa a kolon gere na a ya ra, a man na a xanbi ra. A naxa Isirayila soori fanyie mayegeti, a e ti Siriyakae ya ra.

<sup>11</sup> A naxa soori donxoe lu a xunya Abisayi xa yaamari bun ma, e xa ti Amonikae ya ra.

<sup>12</sup> Yowaba naxa a fala a xunya be, «Xa Siriyakae senbe gbo n be, i xa fa n malide. Xa Amonikae fan senbe gbo i be, n fan sigama i malide.

<sup>13</sup> I xa limaniya, won xa won senbe so won bonsoe xa fe ra nun won Marigi Ala xa taae xa fe ra. Alatala xa a waxonfe raba.»

<sup>14</sup> Yowaba nun a xa soorie naxa Siriyakae gere. Nee naxa e gi Yowaba ma.

<sup>15</sup> Amonikae to a to, Siriyakae bara e gi, e fan naxa e gi Abisayi ma. Yowaba xunya naxa so taa kui, Yowaba naxa gbilen Darisalamu.

<sup>16</sup> Siriyakae to a kolon Isirayila bara e bonbo, e naxa xerae xee Siriyakae ma naxee nu na xure naakiri ma. Hadadeseri xa soori mange Sofaki nan nu na e xunyi ra.

<sup>17</sup> Dawuda to na kolon, a naxa Isirayilakae birin malan, e naxa fa e Yurudɛn igiri, e siga Siriyakae gereɗe. Siriyakae man naxa e gi Isirayilakae ya ra.

<sup>18</sup> Dawuda naxa sɔɔri nun e ragise dɔxɔ wulu solofere faxa, a nun sɔɔri wulu tongo naani gbɛtɛ. A naxa sɔɔri mangɛ Sofaki fan faxa.

<sup>19</sup> Hadadeseri malimae to a kolon a Isirayilakae bara e bɔnbɔ, e naxa lanyi xiri e nun Dawuda tagi, e naxa lu a xa yaamari bun. Kabi na waxati, Siriyakae mu tinma Amonikae malide sɔnɔn.

## 20

### *Dawuda Amonikae nun Filisitakae gerefe (Samuweli II 11:1, 12:26-31)*

<sup>1</sup> Na jɛ igbilenyi, gere tɛmɛi to a li, Yowaba nun a xa sɔɔri gbangbalanyie naxa siga Amonikae gereɗe. Yowaba naxa taa nde suxu naxan xili Raba, a fa menni kana. Dawuda tan naxa lu Darisalamu.

<sup>2</sup> Dawuda naxa mangɛ tɔnxuma xɛɛma daaxi ba Amonikae xa mangɛ xunyi ma, naxan xa binyɛ dangi kilo tongo saxan na. Gɛmɛ tofanyi diyaman daaxi fan nu na a ma. Na mangɛ tɔnxuma naxa dɔxɔ Dawuda xun ma, a fa se gbegebe xanin a xun ma a naxan sɔtɔ gere kui.

<sup>3</sup> Nama naxan nu na naa, Dawuda naxa e xanin a xun ma, a e findi konyie ra naxee wuri, gɛmɛ, nun wure xabama. A Amonikae xa taa birin xa fe raba na ki nɛ. Na xanbi, Dawuda nun a xa sɔɔrie naxa gbilen Darisalamu.

<sup>4</sup> Na to dangi, Isirayilakae nun Filisitakae naxa gere Geseri. Na gere kui, Sibekayi Xusaka naxa

Sipayi faxa. Sipayi findi Refa bɔnsɔɛ nan na. Filisitakae naxa yaagi na fe ma.

<sup>5</sup> Isirayilakae nun Filisitakae man naxa gere. Yi biyaasi Yayiri xa di Elexanan naxa Goliyati xunya Laxami Gatika faxa. A sɛnbɛ nu gbo, a xa tanbɛ xa xungboe nu luxi alɔ dugi sɔxɔ wuri.

<sup>6</sup> Gere gbɛtɛ naxa mini Gati. Xɛmɛ kuye nde nu na, sole senni nan nu na a salonse birin ma, nee malanxi mɔxɔɲɛn nun naani. Na fan Rafa bɔnsɔɛ nan nu a ra.

<sup>7</sup> A to Isirayila konbi, Dawuda xunya Simeya xa di Yonatan naxa a faxa.

<sup>8</sup> Yi xɛmɛ birin fatanxi Rafa bɔnsɔɛ nan ma naxan nu sabatixi Gati. Dawuda nun a xa sɔɔrie naxa e birin sɔntɔ.

## 21

### *Isirayila nama kɔntife* (Samuweli II 24:1-9)

<sup>1</sup> Sentanɛ to wa Isirayila ratantanfe, a naxa Dawuda bɔɲɛ rate a xa Isirayilakae kɔnti.

<sup>2</sup> Dawuda naxa a fala Yowaba nun kuntigie bɛ, «Wo siga, wo xa sa Isirayilakae kɔnti, keli Beriseeba ma, sa dɔxɔ Dana ra. Wo xa na xasabi dentɛgɛ n bɛ.»

<sup>3</sup> Yowaba naxa a yaabi, «Alatala xa Isirayila nama rawuya dɔxɔ kɛmɛ. Mangɛ, n marigi, i xa konyie xa mu nee birin na? I yi mɔɔli maxɔrinxi munfe ra? Munfe ra i wama Isirayila xa yi yunubi sɔtɔ?»

<sup>4</sup> Kɔnɔ mangɛ xui mu matandima, na na a ra Yowaba naxa mini, a naxa Isirayila birin iɲɛɛ, a fa gbilen Darisalamu.

<sup>5</sup> A naxa ɲama xasabi fala Dawuda bɛ. Isirayilakae xa kɔnti nan ya: xɛmɛ santidɛgɛma kanyi miliyɔn keren, wulu kɛmɛ. Yudayakae xa kɔnti nan ya: xɛmɛ santidɛgɛma kanyi wulu kɛmɛ naani, tongo solofere.

<sup>6</sup> Yowaba mu Lewi nun Bunyamin bɔnsɔɛ kɔnti, barima mangɛ xa yaamari mu nu rafanxi a ma.

<sup>7</sup> Yi yaamari naxa ɲaɲaaxu Ala ma. A naxa Isirayila xa tantanyi seri ba.

<sup>8</sup> Dawuda naxa a fala Ala bɛ, «N to yi rabaxi, n bara yunubi belebele raba. Yakɔsi n bara i mayandi i xa diɲɛ i xa konyi xa yunubi ma. Na bara findi n ma daxuɲa ra.»

<sup>9</sup> Alatala naxa a masen Gadi bɛ, naxan findi namijɔnmɛ ra mangɛ bɛ Dawuda xa waxati,

<sup>10</sup> «I xa a fala Dawuda bɛ, Alatala yi nan masenxi i bɛ, «N bara fe saxan masen i bɛ, i xa keren sugandi i wama n xa naxan naba i ra.»

<sup>11</sup> Gadi naxa siga Dawuda yire, a a fala a bɛ, «Alatala yi nan masenxi i bɛ,

<sup>12</sup> «I bara tin ɲaxankate mundun na: kaamɛ xa sin bɔxi ɲɛ saxan, xa na mu i yaxuie xa nɔ wo ra e xa santidɛgɛma ra kike saxan, xa na mu Alatala xa a xa malekɛ xɛɛ a xa Isirayila ɲama halaki, a xa bɔxi birin kana a xa santidɛgɛma ra nun fure ɲaaxi ra xi saxan. Yakɔsi i xa a mato n lan n xa naxan fala n xɛɛma bɛ.»

<sup>13</sup> Dawuda naxa Gadi yaabi, «N bɔɲɛ bara ɲaɲaaxu a xɔrɔxɔɛ ra. A lan n xa n sa Alatala belexɛ i naxan xa kinikini gbo. Na fisa adamadie belexɛɛ bɛ.»

<sup>14</sup> Alatala naxa fure ɲaaxi radin Isirayila ma

han xɛmɛ wulu tongo solofere naxa faxa Isirayila bɔxi ma.

<sup>15</sup> Ala naxa malekɛ xɛɛ Darisalamu, a xa sa naa kana. A nu naa kanafe tɛmɛi naxɛ, Alatala naxa e xa tɔɔrɛ mato, a fa nimisa. A naxa a masen malekɛ bɛ naxan nu na naa kanafe, «Na lan. E lu naa sinden.» Alatala xa malekɛ nu tixi Oronan Yebusuka xa lonyi ma.

<sup>16</sup> Dawuda to a ya rate, a naxa Alatala xa malekɛ to, a tixi koore ma, a xa santidɛgɛma baxi a tɛɛ i, a ya rafindixi Darisalamu ma. Dawuda nun forie naxa sunnun donma ragoro e ma, e e yatagi rafelen bɔxi.

<sup>17</sup> Dawuda naxa a fala Ala bɛ, «N tan xa mu yaamari ti e xa Isirayila jama kɔnti? N tan nan yunubi rabaxi, n tan nan yi fe kobi niyaxi. Nama tan munse rabaxi? N Marigi Alatala, i xa n tan nun ma denbaya halaki, i xa i xa jama lu naa.»

<sup>18</sup> Alatala xa malekɛ naxa a masen Gadi bɛ a xa a fala Dawuda bɛ, a xa te sɛrɛxɛbade yailande Alatala bɛ Oronan Yebusuka xa lonyi ma.

<sup>19</sup> Dawuda naxa te naa alɔ Gadi a fala a bɛ Alatala xili ra ki naxɛ.

<sup>20</sup> Oronan to nu naa lonyi ma, a mɛngi bɔnbɔfe, a naxa a mafindi, a fa malekɛ to. A tan nun a xa di naanie naxa e nɔxun.

<sup>21</sup> Na waxati, Dawuda fan nu sigafe Oronan yire. Oronan to a to, a naxa keli lonyi ma, a sa a felen bɔxi ma Dawuda bun ma.

<sup>22</sup> Dawuda naxa a fala Oronan bɛ, «N wama yi lonyi sarafe i ma, alako n xa sɛrɛxɛbade ti Alatala bɛ. A mati n ma a sare ra, alako fure jaaxi xa jɔn jama ma.»

<sup>23</sup> Oronan naxa Dawuda yaabi, «Mangɛ, a tongo. N marigi xa a waxɔnfe raba a ra. N bara yi ningee fan so i yi ra, e xa findi serɛɛ gan daaxi ra. Yi sarɛtie nɔma gande yege ra, yi mɛngi fan xa findi serɛɛ ra. N bara yi birin fi i ma.»

<sup>24</sup> Kɔnɔ mangɛ Dawuda naxa a fala Oronan bɛ, «Ade, n wama a sarafe nɛ kɔbiri ra naxan lanma seriye ki ma. N mu se bama serɛɛ ra Alatala bɛ, naxan findima i tan harige ra. N mu nɔma serɛɛ gan daaxi bade n mu naxan sare baxi.»

<sup>25</sup> Na kui Dawuda naxa xɛɛma kilo solofere fi Oronan ma na lonyi xa fe ra.

<sup>26</sup> Dawuda naxa serɛɛbade ti mɛnni Alatala bɛ, a fa serɛɛ gan daaxi nun xanunteya serɛɛ ba. A to Alatala maxandi, Alatala naxa a yaabi tɛ ra naxan sinxi serɛɛbade ma keli koore ma.

<sup>27</sup> Na tɛmɛi Alatala naxa wɔyɛn maleke bɛ, a fa santidɛgɛma raso a tɛɛ i.

<sup>28</sup> Dawuda nu serɛɛ bama Oronan Yebusuka xa lonyi nan ma sɔnɔn, barima a nu bara a kolon a Alatala a yaabima mɛnni nɛ.

<sup>29</sup> Alatala xa hɔrɔmɔlingira, Annabi Munsa naxan yailan gbengberenyi ma, a nun serɛɛbade serɛɛ gan daaxi bama dɛnnaxɛ, nee nu na yire itexi nde nɛ Gabayon na waxati.

<sup>30</sup> Kɔnɔ Dawuda mu nu nɔma sode naa, a xa wɔyɛn Ala ra, barima a nu hɛnmɛxi Alatala xa maleke xa santidɛgɛma ra.

## 22

*Ala xa hɔrɔmɔbanxi fɔlɔfe*

<sup>1</sup> Dawuda naxa a masen, «Won Marigi Alatala xa banxi xa ti be, a nun sɛrɛxɛbade, sɛrɛxɛ gan daaxi bama dɛnnaxɛ.»

<sup>2</sup> Dawuda naxa yaamari fi, xɔɾɛ konyi birin naxee sabatixi Isirayila bɔxi ma, e xa malan. A naxa e findi gɛmɛ xabamae ra Ala xa banxi xa wali xa fe ra.

<sup>3</sup> Dawuda naxa wure gɛgɛbe fen, naxan findima lantumae nun naadɛ gbaku see ra. A naxa yɔxui gɛgɛbe fan fen naxan mu nu nɔma maniyade a gɛbe xa fe ra.

<sup>4</sup> Sidɔnkae nun Tirekae naxa Dawuda mali, a naxa wuri fanyi gɛgɛbe sɔtɔ. Na wuri mɔɔli xili nɛ sɛdiri.

<sup>5</sup> Dawuda nu fa a fala, «N ma di Sulemani dimɛdi na a ra, a mu wali kolon sinden. Hɔrɔmɔbanxi naxan tima Alatala bɛ, na lanma a xa tofan, a xa rayabu, a xili xa gbo si birin ya ma.» Na kui, Dawuda se gɛgɛbe malan nɛ na banxi tima naxan na beenu a xa faxa

<sup>6</sup> Dawuda naxa a xa di Sulemani xili, a a fala a bɛ a xa banxi ti Isirayila Marigi Alatala bɛ.

<sup>7</sup> A naxɛ, «N ma di, nate nu na n bɛ n xa banxi ti n Marigi Alatala bɛ,

<sup>8</sup> kɔnɔ Alatala bara yi masen n bɛ yi ki, <I bara wuli ifili a gbe ra n ya i i xa yihadi gereɛ kui, i mixie gɛgɛbe faxa. Na nan a ra, i tan nu lan i xa banxi ti n bɛ.

<sup>9</sup> Kɔnɔ i fama di nde sɔtɔde, naxan findima bɔɾɛsa mixi ra, n malabui fima naxan ma a yaxuie xa fe ra. A xili fama falade Sulemani. Isirayila luma bɔɾɛsa nun maraxarɛ kui a xa simaya birin kui.

<sup>10</sup> A tan nan fama banxi tide n be, a fa findi n ma di ra, n fan findi a baba ra. A xa mangɛya kibanyi buma abadan Isirayila.»

<sup>11</sup> «Yakɔsi, n ma di, Alatala xa lu i sɛeti ma, alako i xa i Marigi Alatala xa banxi ti sɔɔneya ra alo a a falaxi i xa fe ra ki naxe.

<sup>12</sup> Alatala xa lonni nun xaxili fanyi fi i ma a i tima mangɛ ra temui naxe Isirayila boxi ma, alako i xa i Marigi Alatala xa seriye rabatu.

<sup>13</sup> Fe birin fama ne sɔɔneyade i be xa i Alatala xa seriye nun a xa yaamarie rabatuma, a naxee soxi Annabi Munsa yi ra Isirayila be. I xa i senbe so, i xa limaniya. I naxa gaaxu fefe ya ra, i boɓe naxa mini.»

<sup>14</sup> «N ma kate kui, n bara xɛema kilo miliyon saxan, kilo wulu keme naani malan Alatala xa banxi xa fe ra. N man bara gbeti kilo miliyon tongo saxan nun naani malan. Yɔxui nun wure bara gbo han na konti mu noma kolonde. N bara wuri nun gɛme fan fen. I man fama nde sade na xun.

<sup>15</sup> Walike gbegbe na i yi ra naxee fata gɛme xabade, naxee fata gɛme nun wuri masolide. E wali mooli birin kolon.

<sup>16</sup> Xɛema, gbeti, yɔxui, nun wure na i yi ra han a bara dangi a i. Keli, i xa wali suxu keren na! Alatala xa i mali.»

<sup>17</sup> Dawuda naxa a fala Isirayila kuntigi birin be, e xa fa a xa di Sulemani mali. A naxa a fala e be,

<sup>18</sup> «Wo Marigi Alatala mu na wo foxo ra? A mu boɓesa fixi wo ma wo yaxui birin ya ra? A bara bekae sa n belexe i. Yi boxi bara findi Alatala nun a xa pama gbe ra.



19 Wo xa wo Marigi Alatala fen wo bɔɲɛ nun wo nii birin na. Wo keli, wo xa hɔrɔmɔbanxi seniyenxi ti wo Marigi Alatala bɛ, alako wo xa fa Alatala xa saatɛ kankira nun a xa se seniyenxie raso Ala xa banxi kui.»

## 23

### *Lewi bɔnsɔɛ xa kɔnti*

1 Dawuda to bara ɛɛ foride, a naxa a xa di Sulemani sugandi Isirayila mangɛ ra.

2 A naxa Isirayila kuntigie, sɛrɛxɛdubɛɛ, nun Lewikae malan.

3 E naxa Lewikae kɔnti, naxee nu bara ɲɛ tongo saxan sɔtɔ. E kɔnti naxa siga xɛmɛ wulu tongo saxan nun solomasaxan.

4 Dawuda naxa a fala, «N bara mixi wulu mɔxɔɲɛn nun naani ba, e xa e ɲɛngi sa Alatala xa banxi wali rabafe xɔn. Mixi wulu senni xa findi kiitisae ra. Mixi wulu naani xa findi naade kantɛɛ ra.

5 Mixi wulu naani xa Alatala matɔxɔ maxasee xui ra, n naxee yailanxi a matɔxɔ se ra.»

6 Dawuda naxa Lewikae itaxun xunde ma, e benba Lewi xa die ki ma: Gerison, Kehati, nun Merari.

7 Gerison xa die: Ladana nun Simeyi.

8 Ladana xa die: Yɛxiyɛli, di singe, Setama nun Yoweli, e mixi saxan.

9 Simeyi xa die: Selomoti, Xasiyɛli, nun Xarani, e mixi saxan. Ladana xa denbaya kuntigie nan na ki.

10 Simeyi xa die: Yaxati, Sisa, Yeyusu nun Beriya. Simeyi xa di naani nan na ki.

<sup>11</sup> Yaxati, di singe, Sisa, di firin nde. Yeyusu nun Beriya mu di gbegbe soto. E naxa findi denbaya keren na.

<sup>12</sup> Kehati xa die: Amarama, Yisehari, Xebiron, nun Yusiyeli, e mixi naani.

<sup>13</sup> Amarama xa die: Haruna nun Munsa. Haruna naxa findi Ala xa mixi seniyeŋxi ra, a nun a bɔnsɔɛ abadan, alako e xa surayi ba sɛrɛɛ ra Alatala bɛ, e xa a xa wali gbɛtɛ raba, e man xa duba mixi bɛ Ala xili ra tɛmɔi birin.

<sup>14</sup> Munsa findi Ala xa mixi nan na. A xa die naxa lu Lewi bɔnsɔɛɛ ya ma.

<sup>15</sup> Munsa xa die: Gerisomi nun Eliyeseri.

<sup>16</sup> Gerisomi xa die: Sebuweli, di singe.

<sup>17</sup> Eliyeseri xa die: Rexabiya, di singe. Eliyeseri mu di gbɛtɛ soto, kɔnɔ Rexabiya naxa di gbegbe bari.

<sup>18</sup> Yisehari xa die: Selomiti, di singe.

<sup>19</sup> Xebiron xa die: Yeriya, di singe, Amaraya, di firin nde, Yaxasiyeli, di saxan nde, nun Yekameyami, di naani nde.

<sup>20</sup> Yusiyeli xa die: Mike, di singe, nun Yisiya, di firin nde.

<sup>21</sup> Merari xa die: Maxali nun Musi. Maxali xa die: Eleyasari nun Kisi.

<sup>22</sup> Eleyasari faxa nɛ, a mu di xɛmɛ yo lu, kɔnɔ a di ginɛ tan lu nɛ. Kisi xa die naxa e dɔxɔ ginɛ ra, barima e dɛxɔɛ nan nu e ra.

<sup>23</sup> Musi xa die: Maxali, Ederi nun Yerimoti, e di saxan.

<sup>24</sup> Yee nan findi Lewi bɔnsɔɛɛ ra denbaya xunyie ki ma. E birin kɔntixi keren kerɛnyi ra. E nu walima Alatala xa banxi kui kabi e na jɛ mɔxɔɲɛn.

<sup>25</sup> Dawuda nu bara a fala, «Isirayila Marigi Alatala bara bo'esa fi a xa nama ma. E xa lu Darisalamu abadan.

<sup>26</sup> Lewikae mu fama Ala xa ho'omolingira nun a yirabasee xaninde so'non.»

<sup>27</sup> Dawuda xa nate donxo'e nan na ki, Lewikae kontife naxee bara je mo'xon'en soto.

<sup>28</sup> E nu Haruna xa die malima Alatala xa banxi wali ra, alo meenife tete nun konkoe ma, se raseniyenfe, wali xunxuri rabafe Ala xa banxi kui,

<sup>29</sup> taami yailanfe naxan bama serexe ra Ala be, farin dinfe naxan findima serexe ra, taami lebinitare yailanfe, nun donse mo'oli birin nafalafe.

<sup>30</sup> E nu lanma e xa Alatala matxo'geesege nun nunmare birin.

<sup>31</sup> E man nu serexe gan daaxie bama Alatala be malabui lo'xo'ee ma, Kike Neene Sali, nun sali xungbe waxati. E nu lanma e xa Alatala rabatu a seriy'e ki ma.

<sup>32</sup> E tan nan nu Kiri Banxi Naralande nun yire seniyenxi kantama. E man nu e ngaxakerenyi Haruna xa die xa yaamari rabatuma Alatala xa banxi wali rabafe ma.

## 24

### *Serexedubee itaxunfe*

<sup>1</sup> Haruna nu bara di naani soto: Nadabo, Abihu, Eleyasari, nun Itamari.

<sup>2</sup> Nadabo nun Abihu singe naxa faxa e baba be. E mu di yo bari. Eleyasari nun Itamari nan nu na serexedubee ra.

<sup>3</sup> Sadoki, Eleyasari xa di, nun Aximeleki, Itamari xa die, naxa Dawuda mali Haruna xa die itaxunfe ra e wali ki ma.

<sup>4</sup> Mangɛe nu wuya Eleyasari xa die nan ya ma, dangi Itamari xa die ra. Na nan a to e naxa Eleyasari xa die findi denbaya fu nun senni ra. Itamari xa die naxa findi denbaya solomasaxan na.

<sup>5</sup> E naxa e sugandi Ala xa mali ra, barima Eleyasari xa die nun Itamari xa die birin findixi Ala xa walikɛe nan na.

<sup>6</sup> Netaneeli xa di Semaya Lewika nan nu e xilie sebɛma mangɛ, kuntigie, sɛrɛxɛdubɛ Sadoki, Abiyatari xa di Aximeleki, nun sɛrɛxɛdubɛe xa denbaya xunye, nun Lewikae ya xɔri. E naxa denbaya keren sugandi Eleyasari xa die ya ma, e man naxa keren sugandi Itamari xa die ya ma.

<sup>7</sup> Ala naxa a ragiri denbayae xa sugandi yi ki: a singe Yehoyaribu, a firin nde Yɛdaya,

<sup>8</sup> a saxan nde Xarima, a naani nde Seyorimi,

<sup>9</sup> a suuli nde Malakiya, a senni nde Miyamin,

<sup>10</sup> a solofere nde Hakɔsi, a solomasaxan nde Abiya,

<sup>11</sup> a solomanaani nde Yosuwe, a fu nde Sekanaya,

<sup>12</sup> a fu nun keren nde Eliyasibu, a fu nun firin nde Yakimi,

<sup>13</sup> a fu nun saxan nde Xupa, a fu nun naani nde Yesebeyabi,

<sup>14</sup> a fu nun suuli nde Biliga, a fu nun senni nde Imeri,

<sup>15</sup> a fu nun solofere nde Xesiri, a fu nun solomasaxan nde Hapisesi,

16 a fu nun solomanaani nde Petaxiya, a mɔxɔɓɛn nde Yesekiyeli,

17 a mɔxɔɓɛn nun keren nde Yakin, a mɔxɔɓɛn nun firin nde Gamulu,

18 a mɔxɔɓɛn nun saxan nde Delaya, a mɔxɔɓɛn nun naani nde Maasiya.

19 A nu lan e xa Alatala xa hɔrɔmɔbanxi xa wali suxu na ki nɛ, alɔ e benba Haruna a fala e bɛ ki naxɛ. Isirayila Marigi Alatala nu bara na yaamari so Haruna yi ra.

20 Lewi bɔnsɔɛ gbetɛe nan ya. Amarama xa die: Subayeli. Subayeli xa die: Yexedeya.

21 Rexabiya xa die: Yisiya, di singe.

22 Yisehari xa die: Selomoti. Selomoti xa die: Yaxati.

23 Xebiron xa die: Yeriya, di singe, Amaraya, di firin nde, Yaxasiyeli, di saxan nde, Yekameyami, a xa di naani nde.

24 Yusiyeli xa die: Mike. Mike xa die: Samiri.

25 Mike xunya: Yisiya. Yisiya xa die: Sakari.

26 Merari xa die: Maxali nun Musi a nun a xa mamadi Yaasiyahu.

27 Merari xa mamadie: Yaasiyahu, Sohami, Sakuru, nun Ibiri.

28 Maxali xa die: Eleyasari. Eleyasari mu di yo soto.

29 Kisi xa die: Yerameeli.

30 Musi xa die: Maxali, Ederi, nun Yerimoti. Lewi xa die nan ya a denbaya ki ma.

31 E fan sugandixi Ala xa mali nan na alɔ e ngaxakerenyie Haruna xa die. Na raba mangɛ Dawuda, Sadɔki, Aximeleki, sɛrɛxɛdubɛɛ xa denbaya xunyie, nun Lewikae ya xɔri. Na kui Eleyasari nun Itamari xa denbayae birin lan.

## 25

*Bæetibæe*

<sup>1</sup> Dawuda nun soori mang'ee naxa Asafi, Heman, nun Yedutun bonsoee sugandi e xa namiponme masenyi ti bæeti daaxi, kora'e nun maxasee xui ra. Xeme'e xilie nan ya naxee nu na wali rabama:

<sup>2</sup> Asafi xa die: Sakuru, Yusufu, Netaniya, nun Asareela. Asafi xa die, naxee nu na a xa yaamari bun ma, naxee nu namiponme masenyi tima mang'e be:

<sup>3</sup> Yedutun xa die: Gedalaya, Seri, Yesaya, Simeyi, Xasabiya, nun Matitiya. Na mixi senni naxa lu e baba Yedutun xa yaamari bun ma. Yedutun nu namiponme masenyi tima kora xui ra, alako a xa Alatala matoxo, a xa a tantu.

<sup>4</sup> Heman xa die: Buukiya, Mataniya, Yusiyeli, Sebuweli, Yerimoti, Xananiya, Xanani, Eliyata, Gidaliti, Romanti Eseri, Yosobekasa, Maloti, Hotiri, Maxasiyoti.

<sup>5</sup> Yi mixi birin findixi Heman xa die nan na, naxan nu Ala xui madangima mang'e be. Ala naxa senbe fi a ma, a xa di fu nun naani soto, a nun di gine saxan.

<sup>6</sup> Nee birin nu na e baba xa yaamari bun ma, e xa bæeti ba kora'e xui ra Alatala xa banxi kui. Asafi, Yedutun, nun Heman nu na mang'e xa yaamari nan bun ma.

<sup>7</sup> Yi karamoxo naxee fata bæeti bade Alatala be, e findi mixi keme firin mixi tongo solomasaxan nun solomasaxan nan na.

<sup>8</sup> E birin sugandixi Ala xa mali nan na e xa wali keɓa ma, tagi rasa yo mu nu na a lanmadi, a xungbe, a karamɔxɔɛ, nun a xarandi tagi.

<sup>9</sup> Ala naxa a ragiri e xa sugandi yi ki: A singe, Asafi xa di Yusufu. A firin nde, Gɛdalaya, a xunyaɛ, nun a xa die, e mixi fu nun firin.

<sup>10</sup> A saxan nde, Sakuru, a xa die, nun a xunyaɛ, e mixi fu nun firin.

<sup>11</sup> A naani nde, Yisiri, a xa die, nun a xunyaɛ, e mixi fu nun firin.

<sup>12</sup> A suuli nde, Netaniya, a xa die, nun a xunyaɛ, e mixi fu nun firin.

<sup>13</sup> A senni nde, Buukiya, a xa die, nun a xunyaɛ, e mixi fu nun firin.

<sup>14</sup> A solofere nde, Yesarela, a xa die, nun a xunyaɛ, e mixi fu nun firin.

<sup>15</sup> A solomasaxan nde, Yesaya, a xa die, nun a xunyaɛ, e mixi fu nun firin.

<sup>16</sup> A solomanaani nde, Mataniya, a xa die, nun a xunyaɛ, e mixi fu nun firin.

<sup>17</sup> A fu nde, Simeyi, a xa die, nun a xunyaɛ, e mixi fu nun firin.

<sup>18</sup> A fu nun keren nde, Asareli, a xa die, nun a xunyaɛ, e mixi fu nun firin.

<sup>19</sup> A fu nun firin nde, Xasabiya, a xa die, nun a xunyaɛ, e mixi fu nun firin.

<sup>20</sup> A fu nun saxan nde, Subayeli, a xa die, nun a xunyaɛ, e mixi fu nun firin.

<sup>21</sup> A fu nun naani nde, Matitiya, a xa die, nun a xunyaɛ, e mixi fu nun firin.

<sup>22</sup> A fu nun suuli nde, Yerimoti, a xa die, nun a xunyaɛ, e mixi fu nun firin.

<sup>23</sup> A fu nun senni nde, Xananiya, a xa die, nun a xunya'e, e mixi fu nun firin.

<sup>24</sup> A fu nun solofere nde, Yosobekasa, a xa die, nun a xunya'e, e mixi fu nun firin.

<sup>25</sup> A fu nun solomasaxan nde, Xanani, a xa die, nun a xunya'e, e mixi fu nun firin.

<sup>26</sup> A fu nun solomanaani nde, Maloti, a xa die, nun a xunya'e, e mixi fu nun firin.

<sup>27</sup> A məxəpən nde, Eliyata, a xa die, nun a xunya'e, e mixi fu nun firin.

<sup>28</sup> A məxəpən nun keren nde, Hotiri, a xa die, nun a xunya'e, e mixi fu nun firin.

<sup>29</sup> A məxəpən nun firin nde, Gidaliti, a xa die, nun a xunya'e, e mixi fu nun firin.

<sup>30</sup> A məxəpən nun saxan nde, Maxasiyoti, a xa die, nun a xunya'e, e mixi fu nun firin.

<sup>31</sup> A məxəpən nun naani nde, Romanti Eseri, a xa die, nun a xunya'e, e mixi fu nun firin.

## 26

### *Hərəməbanxi naadε kantε*

<sup>1</sup> Naadε kantε nan ya: Kore xa die naxan baba findi Asafi ra: Meselemiya.

<sup>2</sup> Meselemiya xa die: Sakari nan na di singe ra, Yediyayeli, nan na a firin nde ra, Sebadaya nan na a saxan nde ra,

<sup>3</sup> Yataniyeli nan na a naani nde ra, Elama nan na a suuli nde ra, Yehoxanan nan na a senni nde ra, Eliyehowenayi nan na a solofere nde ra.

<sup>4</sup> Obedo Edon xa die: Semaya, di singe, Yehosabadi di firin nde, Yowa di saxan nde, Sakara di naani nde, Netaneeli, di suuli nde,



<sup>5</sup> Amiyeli, di senni nde, Isakari, di solofere nde, Pewuletayi, di solomasaxan nde. Ala nu bara baraka sa Obedo Edon xa fe.

<sup>6</sup> A xa di singe Semaya naxa di xemɛɛ bari naxee findixi kuntigie ra e xa denbayae xun ma barima e senbe nu gbo.

<sup>7</sup> Semaya xa die: Otini, Refayeli, Obedo, Elesabada, nun e xunyaɛ Elihu nun Semakiya, xemɛ gbangbalanyie.

<sup>8</sup> Yi mixi tongo senni nun firin birin baba nu lanxi Obedo Edon nan ma. E senbe nu gbo ki fanyi Ala xa wali kui.

<sup>9</sup> Meselemiya xa die nun a xunyaɛ findixi mixi fu nun solomasaxan nan na. E senbe fan nu gbo.

<sup>10</sup> Merari xa di Xosa naxa di xemɛɛ bari: Simiri, a baba naxan findi xunyi ra hali di singe to mu nu a ra.

<sup>11</sup> Xilikiya, a firin nde, Tebaliya, a saxan nde, Sakari, a naani nde. Xosa xa die nun a xunyaɛ nu lanxi mixi fu nun saxan nan ma.

<sup>12</sup> Yi mixi birin nun e xunyaɛ findixi naade kantɛɛ nan na Alatala xa banxi kui.

<sup>13</sup> E nu luma mixi sugandi ra Ala xa mali ra alako e xa a kolon nde lan a xa naade mundun kanta. Denbaya birin, mixi xuri nun mixi xungbe, e birin nu na na konti kui.

<sup>14</sup> Ala naxa a ragiri sogetede naade xa ilan Selemiya ra. Koola naade naxa ilan a xa di Sakari ra, naxan findixi lonnila ra.

<sup>15</sup> Yirefanyi naade naxa ilan Obedo Edon na. A xa die fan naxa lan banxi ma see ragatama dennaxe.

<sup>16</sup> Sogedorode naade naxa ilan Supimi nun Xosa ra Alatala xa maragiri saabui ra. E naxa

Saaleketi naade fan kanta, naxan nu na kira ma naxan tema. Xunde firin nu na menni, e ya rafindixi e boore ma.

<sup>17</sup> Lewika senni nu na sogetede biri, mixi naani koola biri, mixi naani yirefanyi biri, mixi naani see ragatama banxi naxan kui, yire firin,

<sup>18</sup> sogegorode biri, mixi naani nu na kira de ra, mixi firin banxi sode de ra.

<sup>19</sup> Naade kantee nan na ki naxee kelixi Kore nun Merari xa die ya ma.

<sup>20</sup> Lewikae nan ya naxee nu e jengi sama naafuli nun se seniyenxie xon ma naxee ragatayi Ala xa horomobanxi kui.

<sup>21</sup> Ladana xa di naxee fatanxi Gerison bonsoe ra Ladana saabui ra, e xa denbaya xunye nu lanxi Yexiyeli nan ma.

<sup>22</sup> Yexiyeli xa die fan, Setama nun a xunya Yoweli, nu e jengi saxi naafuli xon ma naxan nagatayi Alatala xa horomobanxi kui.

<sup>23</sup> Amaramakae, Yiseharikae, Xebironkae, nun Yusiyelikae

<sup>24</sup> naxa Gerisomi xa di Sebuweli, Munsa xa mamadi, sugandi a xa meeni naafuli ma,

<sup>25</sup> e nun a bari boore naxee fatanxi Eliyeseri xabile ra. E findi Eliyeseri xa di Rexabiya nan na, na fan xa di Yesaya, na fan xa di Yorami, na fan xa di Sikiri, nun na fan xa di Selomiti.

<sup>26</sup> Selomiti nun a bari booree nan nu e jengi sama naafuli nun se seniyenxie xon ma, mange Dawuda naxee radaxa xabile mixi wulu yarerati, mixi keme yarerati, nun soori xunye nan nee fixi Ala ma.

<sup>27</sup> E nu bara e harige ba Alatala xa banxi be e naxan soto gere kui.

<sup>28</sup> Selomiti nun a xunya'e man nu e jengi sama naafuli fan xon ma, Annabi Samuweli, Kisi xa di Solu, Neri xa di Abeneri, nun Seruya xa di Yowaba naxan fixi Ala ma.

<sup>29</sup> Kenaniya nun a xunya'e, naxee findi Yisehari bonsɔɛ ra, nan nu e jengi saxi kiiti safe xon ma Darisalamu fari ma Isirayila.

<sup>30</sup> Xasabiya nun a xunya'e, naxee nu na Xebiron, xeme gbangbalanyie, e mixi wulu keren keme solofere, e nu e jengi sama Isirayila boxi xon ma naxan nu na Yuruden naakiri ma sogegorode mabiri. E nu e jengi sama Alatala nun mange xa wali xon ma menni biri.

<sup>31</sup> Yeriya findi Xebiron mange nan na a xabile ki ma. Dawuda xa mangeya je tongo naani nde, mixi ndee naxa taruxuie mato, e fa a kolon xeme gbangbalanyie na Yaaseri, Galadi boxi ma.

<sup>32</sup> A ngaxakerenyi gbangbalanyie nu lanxi mixi wulu firin keme solofere nan ma, e birin xabile xunyie. Mange Dawuda naxa e findi Ruben, Gadi, nun Manasi bonsɔɛ seeti keren xunyie ra.

## 27

### *Isirayila sɔɔrie*

<sup>1</sup> Isirayila sɔɔrie xunyie nan ya naxee findi denbaya xunyie ra. E tan nan nu findixi mange xa sɔɔri gali xunyie ra, sɔɔri wulu nun sɔɔri keme ki ma. Kike yo kike xeme wulu mɔxɔɔɛn nun naani nu sɔɔri wali rabama.

<sup>2</sup> Sabadiyeli xa di Yasobeyami findi xunde singe xa mange nan na, je kike singe. Xeme wulu mɔxɔɔɛn nun naani nu na a xa yaamari bun ma.

<sup>3</sup> Sabadiyeli findi Peresi xa di nde nan na. A findi soori birin xa mangɛ nan na jɛ kike singe.

<sup>4</sup> Dodayi Axowaka findi xundɛ firin nde mangɛ nan na jɛ kike firin nde. Mikiloti naxa findi a xa soorie xunyi ra. Xɛmɛ wulu mɔxɔɓɛn nun naani nu na a xa yaamari bun ma.

<sup>5</sup> Sɛrɛxɛdubɛ Yehoyada xa di Bɛnaya findi xundɛ saxan nde mangɛ nan na jɛ kike saxan nde. Xɛmɛ wulu mɔxɔɓɛn nun naani nu na a xa yaamari bun ma.

<sup>6</sup> Bɛnaya nan nu na Dawuda xa soori tongo saxanyie xunyi ra. A xa di Amisabadi nu na a baba xa yaamari bun ma.

<sup>7</sup> Yowaba xunya Asaheli findi xundɛ naani nde mangɛ nan na jɛ kike naani nde. A xa di Sebadaya naxa findi a jɔxɔɛ ra. Xɛmɛ wulu mɔxɔɓɛn nun naani nu na a xa yaamari bun ma.

<sup>8</sup> Samehuti Yisiraka findi xundɛ suuli nde mangɛ nan na jɛ kike suuli nde. Xɛmɛ wulu mɔxɔɓɛn nun naani nu na a xa yaamari bun ma.

<sup>9</sup> Ikesi xa di Ira Tekowaka findixi xundɛ senni nde mangɛ nan na jɛ kike senni nde. Xɛmɛ wulu mɔxɔɓɛn nun naani nu na a xa yaamari bun ma.

<sup>10</sup> Xɛlesi Pelonka naxan fatan Efirami bɔnsɔɛ ra findi xundɛ solofere nde mangɛ nan na jɛ kike solofere nde. Xɛmɛ wulu mɔxɔɓɛn nun naani nu na a xa yaamari bun ma.

<sup>11</sup> Sibekayi Xusaka naxan fatan Sera xabile ra findi xundɛ solomasaxan nde mangɛ nan na jɛ kike solomasaxan nde. Xɛmɛ wulu mɔxɔɓɛn nun naani nu na a xa yaamari bun ma.

<sup>12</sup> Abiyeseri Anatotika naxan fatan Bunyamin bɔnsɔɛ ra findi xundɛ solomanaani nde mangɛ

nan na ɲɛ kike solomanaani nde. Xɛmɛ wulu mɔxɔɲɛn nun naani nu na a xa yaamari bun ma.

<sup>13</sup> Maharayi Netofaka naxan fatan Sera xabile ra findi xundɛ fu nde mangɛ nan na ɲɛ kike fu nde. Xɛmɛ wulu mɔxɔɲɛn nun naani nu na a xa yaamari bun ma.

<sup>14</sup> Bɛnaya Piratonka naxan fatan Efirami bɔnsɔɛ ra findi xundɛ fu nun keren nde mangɛ nan na ɲɛ kike fu nun keren nde. Xɛmɛ wulu mɔxɔɲɛn nun naani nu na a xa yaamari bun ma.

<sup>15</sup> Xeledayi Netofaka naxan fatan Otiniyeli xabile ra findi xundɛ fu nun firin nde mangɛ nan na ɲɛ kike fu nun firin nde. Xɛmɛ wulu mɔxɔɲɛn nun naani nu na a xa yaamari bun ma.

<sup>16</sup> Isirayila bɔnsɔɛɛ xa sɔɔrie xa mangɛ nan ya: Ruben bɔnsɔɛ xun ma, Sikiri xa di Eliyeseri. Simeyɔn bɔnsɔɛ xun ma, Maaka xa di Sɛfataya,

<sup>17</sup> Lewi bɔnsɔɛ xun ma, Kemuweli xa di Xasabiya. Sɛrɛxɛdubɛ Sadɔki nan nu na Haruna xabile xun ma.

<sup>18</sup> Yudaya bɔnsɔɛ xun ma, Dawuda taara Elihu. Isakari bɔnsɔɛ xun ma, Mikayeli xa di Omeri.

<sup>19</sup> Sabulon bɔnsɔɛ xun ma, Abadiyasi xa di Yisemaya. Nafatali bɔnsɔɛ xun ma, Asiriyeli xa di Yerimoti.

<sup>20</sup> Efirami bɔnsɔɛ xun ma, Asasiya xa di Hoseya. Manasi bɔnsɔɛ sɛɛti keren xun ma, Pɛɗaya xa di Yoweli.

<sup>21</sup> Manasi bɔnsɔɛ sɛɛti boore xun ma sogetede biri, Sakari xa di Ido. Bunyamin bɔnsɔɛ xun ma, Abeneri xa di Yaasiyeli.

<sup>22</sup> Dana bõnsõe xun ma, Yeroxama xa di Asareli. Isirayila bõnsõee xa soorie xa mangêe nan na ki.

<sup>23</sup> Dawuda mu mixie konti, naxee nu bara ge je mõxõnen sotode, barima Alatala nu bara a masen a Isirayilakae wuyama ne alo tunbuie.

<sup>24</sup> Seruya xa di Yowaba nu bara Isirayilakae konti folo, kono a mu a rajon Alatala xa xone xa fe ra Isirayila ma. Na konti mu sebexi Dawuda xa taruxui buki kui.

<sup>25</sup> Adiyeli xa di Asamafeti findi mange xa naafuli ragate nan na. Yusiya xa di Yonatan fan findi mange xa naafuli ragate nan na Darisalamu fari ma, daaxa nun taa gbete kui.

<sup>26</sup> Kelubu xa di Esiri findi mange xa xe sae xunyi nan na.

<sup>27</sup> Simeyi Ramatika nan nu a joxo sama mange xa weni bilie xon ma. Sabidi Sefamika nan fan nu a joxo sama mange xa weni ragatadee xon ma.

<sup>28</sup> Bali Xanan Gederika nan nu meenima mange xa oliwi nun sikomoro xee ma Sefela boxi ma. Yowasi nan fan nu meenima mange xa ture ragatadee ma.

<sup>29</sup> Sitirayi Saronka nan nu meenima mange xa xuruse xungbee ma Saron boxi ma. Adalayi xa di Safati nan fan nu meenima mange xa xuruse xungbee ma gulunba kui.

<sup>30</sup> Sumayila xa di Obili nan nu meenima mange xa joxome ma. Yexedeya Meronotika nan fan nu meenima mange xa sofalee ma.

<sup>31</sup> Yasisi Hagarika nan nu meenima mange xa xuruse lanmae ma. Yi mixie birin nu e jengi sama mange Dawuda harige nan xon ma.

<sup>32</sup> Mange Dawuda baba xunya Yonatan findi mixi rasi, lɔnnila, nun sebeliti nan na. Xakimoni xa di Yexiyeli nan nu mɛɛnima mangɛ xa die ma.

<sup>33</sup> Axitofeli fan findi mangɛ rasima nan na. Arakika Xusayi findi mangɛ dɛfanboore nan na.

<sup>34</sup> Bɛnaya nun Abiyatari xa di Yehoyada naxa findi Axitofeli ꞓɔxɔɛ ra. Yowaba naxa findi soorie xa mangɛ xungbe ra.

## 28

### *Dawuda waxɔnfe Ala xa hɔrɔmɔbanxi xa fe ra*

<sup>1</sup> Dawuda naxa Isirayila xunyie birin malan Darisalamu, bɔnsɔɛ xunyie, soori xundɛɛ xunyie, mixi wulu nun mixi kɛmɛ xunyie, mangɛ xa naafuli mɛɛnimae, mangɛ xa xurusee mɛɛnimae, mangɛ xa die mɛɛnimae, mangɛ xa denbaya mɛɛnimae, xɛmɛ gbangbalanyie, nun kuntigi birin.

<sup>2</sup> Mange Dawuda naxa ti, a a masen e bɛ, «N ngaxakerenyie nun n ma ꞓama, wo wo tuli mati n na. Nate nu na n bɛ, n xa banxi ti Alatala xa saate kankira dɔxɔma dɛnnaxɛ, naxan nɔma findide won Marigi Ala lude ra. Na kui, n bara na wali fɔlɔ.»

<sup>3</sup> «Kɔnɔ Ala naxa a masen n bɛ <I mu banxi tima n bɛ n luma dɛnnaxɛ, barima yihadila nan i ra. I bara adamadie faxa.>

<sup>4</sup> Isirayila Marigi Alatala n tan nan sugandixi n baba xa mixi birin tagi, n xa findi Isirayila mangɛ ra abadan, barima a Yuda nan sugandixi a xa findi xunyi ra, a n baba xa denbaya sugandi Yuda bɔnsɔɛ birin tagi. N baba xa die birin ya ma, a n tan nan sugandixi, n xa findi Isirayila mangɛ ra.

<sup>5</sup> N ma di xeme wuyaxie tagi, Ala naxee fixi n ma, a n ma di Sulemani nan sugandixi Isirayila mangɛ ra, Alatala xa mangɛya bun ma.»

<sup>6</sup> «Ala naxa a masen n be <I xa di Sulemani nan n ma hɔrɔmɔbanxi nun a tete tima, barima n bara a sugandi n ma di ra, n tan yete yati nan findima a baba ra.

<sup>7</sup> N fama a xa mangɛya rasabatide abadan, xa a n ma yaamarie nun n ma seriyee rabatuma alo a na rabafe ki naxe to.»

<sup>8</sup> «To lɔxɔe, n bara a fala won Marigi Ala ya xɔri Isirayilaka birin be, Alatala xa nama, wo xa wo Marigi Alatala xa seriyee birin nabatu. Wo xa na nate tongo Ala ya xɔri naxan wo xui birin namema. Wo xa na raba alako wo xa yi bɔxi fanyi masɔto, a xa findi ke ra wo xa die be naxee fama wo xanbi ra abadan.

<sup>9</sup> N ma di Sulemani, i xa i baba Marigi Alatala kolon, a naxan batuma. I fan xa a batu i bɔne nun i janige birin na, barima Alatala a kolon naxan na sondonyi birin kui. A adama janige birin kolon. Xa i Alatala fen, a tinma ne i xa a to. Kɔnɔ xa i a rabejin, a fan i rabejinma ne kerenyi ra.

<sup>10</sup> I xa a mato, Alatala bara i sugandi, alako i xa a xa hɔrɔmɔbanxi ti. I xa limaniya, i xa na wali suxu.»

<sup>11</sup> Dawuda naxa hɔrɔmɔbanxi ti ki tagi raba Sulemani be, a tete, a rabilinyi banxie, naafuli yire, konkoe itexie, konkoe gbete, nun saate kankira dɔxɔde.

<sup>12</sup> Dawuda naxa fe birin masen a xa di be naxan nu na a xaxili ma Alatala xa hɔrɔmɔbanxi



tife ra, alo tete, konkoe, naafuli yire, nun se seniyenxie yire.

<sup>13</sup> A man naxa a tagi raba a be serexedubee nun Lewikae itaxunma ki naxe, a nun e walima ki naxe Alatala xa banxi kui. A naxa se birin masen a be naxan nawalima Alatala xa banxi kui.

<sup>14</sup> A naxa wali se xema daaxie nun gbeti daaxie xa binye xasabi masen a be.

<sup>15</sup> A naxa lanpui doxosee nun lanpuie xa binye xasabi masen a be, naxee yailanma xema ra a nun naxee yailanma gbeti ra.

<sup>16</sup> A naxa xema nun gbeti binye xasabi masen a be naxan yailanma teebilie ra serexe taami sama naxee fari.

<sup>17</sup> A naxa yirabase xema nun gbeti daaxi mooli birin xa binye xasabi masen a be.

<sup>18</sup> A naxa surayi serexebade xema daaxi xa binye xasabi masen a be, a nun na yailan ki. A naxa a masen a be na mange ragise nun na maleke sawure xema daaxie, naxee gabutenyie italaxi Alatala xa saate kankira xun ma, nee yailanma ki naxe.

<sup>19</sup> Dawuda naxa a fala a be, «Alatala nan yi birin sebexi. N naxan masenxi i be a fatanxi a xaxili nan na.»

<sup>20</sup> Dawuda naxa a fala a xa di Sulemani be, «I senbe so, i xa limaniya. Wali suxu. I naxa gaaxu fefe ma, barima n Marigi Alatala na i seti ma. A mu i rabejinma. A mu i raboloma han i ge a xa hromobanxi wali birin na.

<sup>21</sup> Serexedubee nun Lewika xunde birin na i xanbi ra Ala xa banxi xa wali xa fe ra. Walike mooli birin na naa naxee fata wali ra. Kuntigie nun nama fan e tuli matima i xa yaamari birin

na.»

## 29

### *Dawuda xa masenyi Isirayila bɛ*

<sup>1</sup> Mangɛ Dawuda naxa a fala pama birin bɛ, «N ma di Sulemani, Ala naxan sugandixi, a mu gɛxi mɔde, a sɛnbɛ mu gbo sinden. Wali naxan na bɛ, a gbo, barima banxi xa mu a ra naxan tima mixi bɛ. A tima Alatala nan bɛ.

<sup>2</sup> N bara n sɛnbɛ birin sa n Marigi Ala sagoe a xa banxi tife ra. N bara xɛɛma, gbeti, yɔxui, wure, wuri, gɛmɛ tofanyi, diyaman mooli birin, nun gɛmɛ fixɛ gbegbe malan, alako e xa rawali e rawali ki ma.

<sup>3</sup> Dangi na ra, n bara n harige birin, xɛɛma nun gbeti, fi n Marigi Ala xa hɔrɔmɔbanxi xa fe ra, barima yi wali tide gbo n bɛ.

<sup>4</sup> N harige nan ya: xɛɛma Ofiri daaxi kilo wulu kɛmɛ wulu firin, gbeti fanyi kilo wulu kɛmɛ firin tongo saxan nun solomasaxan. Na findima banxi yiree maso se nan na.

<sup>5</sup> Xɛɛma nun gbeti birin xa rawali a rawali ki ma, alako walikɛe xa wali xa sɔɔneya. Yakɔsi, nde bara panige nde tongo Alatala bɛ to?»

<sup>6</sup> Denbaya xunyie, Isirayila bɔnsɔɛ kuntigie, mixi wulu nun mixi kɛmɛ xunyie, nun mangɛ xa wali xunyie naxa janige tongo yi wali xa fe ra.

<sup>7</sup> E naxa yi harige xasabi fi Ala xa banxi xa fe ra: xɛɛma, kilo wulu kɛmɛ tongo solofere, gbeti kilo wulu kɛmɛ saxan tongo naani, yɔxui kilo wulu kɛmɛ senni fu nun firin, a nun wure kilo miliyon saxan wulu kɛmɛ naani.

<sup>8</sup> Birin naxa gɛmɛ tofanyie so Yɛxiyeli Gerisonka yi ra, naxan nu naafuli ragatama Alatala xa banxi xa fe ra.

<sup>9</sup> Nama naxa sɛɛwa e janige xa fe ra, barima e na rabaxi e bɔɲɛ birin nan na Alatala bɛ. Mangɛ Dawuda fan naxa sɛɛwa na xa fe ra.

<sup>10</sup> Dawuda naxa Alatala tantu jama birin ya xɔri. A naxa a fala,  
«Muxu benba Isirayila Marigi Alatala,  
tantui na i bɛ abadan.

<sup>11</sup> Alatala, binyɛ, senbɛ, nun matɔxɔɛ birin na i bɛ.

Se naxan birin na koore nun bɔxi ma,  
i tan nan gbe a ra.

Dunɪɲa birin na i tan nan xa mangɛya bun ma.

<sup>12</sup> Bannaya nun xunnakeli fatanxi i tan nan na.

I se birin yamarima,  
senbɛ birin na i yi ra.

I keren nan nɔma mixi gbode,  
i keren nan nɔma a rasabatide.»

<sup>13</sup> «Muxu Marigi Ala, to, muxu bara i tantu,  
muxu bara i xili makaabaxi matɔxɔ.

<sup>14</sup> N tan nun n ma jama senbɛ mu nɔma yi harige mɔɔli sɔtɔde. A birin kelima i tan nan ma. Muxu tan mu sese fima, i tan singe mu naxan fixi muxu ma.

<sup>15</sup> Muxu luma alɔ xɔɲɛɛ i ya i, alɔ muxu benbae. Muxu xa simaya luxi nɛ yi bendɛ fuɲi fari alɔ niini naxan minima a mu bu a lɔɛ. Xaxili tide yo mu na muxu bɛ.

<sup>16</sup> Muxu Marigi Alatala, yi harige fanyi birin kelima i tan nan ma, muxu naxan xunlanxi alako muxu xa banxi ti i xili seniyeɲxi bɛ. I tan nan gbe na a birin na.»

<sup>17</sup> «N Marigi Ala, n a kolon i bɔɔɛ birin kolon, tinxinyi man rafan i ma. N yi sɛrɛxɛ janigexi i bɛ n bɔɔɛ tinxinxi nan na. N man bara a to, i xa nama fan sɛrɛxɛ fixi i ma a tan janige kerenyi nan kui e sɛwaxi ra.

<sup>18</sup> Muxu babae Iburahima, Isiyaga, Isirayila Marigi Alatala, i xa yi xaxili rasabati i xa nama bɔɔɛ kui, alako e naxa i yanfa.

<sup>19</sup> N ma di Sulemani mali alako a fan xa bira i xa yaamari, i xa xaranyi, nun i xa sɛriyɛ fɔxɔ ra a bɔɔɛ birin na. A man xa yi banxi ti n naxan fɔlɔxi yi ki.»

<sup>20</sup> Dawuda naxa a fala nama birin bɛ, «Wo wo Marigi Alatala tantu.» Nama naxa e babae Marigi Alatala tantu, e fa e igoro, e e felen Alatala bɛ mangɛ ya xɔri.

<sup>21</sup> Na lɔxɔɛ kuye iba, Isirayila naxa sɛrɛxɛɛ nun sɛrɛxɛ gan daaxi gbegbe ba Alatala bɛ: tuura wulu keren, yɛxɛɛ kontonyi wulu keren, yɛxɛɛ lanma wulu keren, weni sɛrɛxɛ, a nun sɛrɛxɛ gbɛtɛɛ.

<sup>22</sup> E naxa e dɛge na lɔxɔɛ, e e min Alatala ya i nɛlɛxinyi belebele kui. E man naxa Dawuda xa di Sulemani ti mangɛ ra a sanmaya firin nde. E naxa ture sa a xunyi ma Alatala ya i, a xa findi e xa yarerati ra. E naxa Sadɔki fan ti sɛrɛxɛdubɛ ra.

<sup>23</sup> Sulemani naxa dɔxɔ Alatala xa mangɛ kibanyi kui, a findi mangɛ ra a baba Dawuda nɔxɔɛ ra. A naxa xunnakeli sɔto, Isirayila birin naxa a xa yaamari rabatu.

<sup>24</sup> Kuntigie, sɔorie, nun mangɛ Dawuda xa die birin naxa tin lude mangɛ Sulemani xa yaamari

bun ma.

<sup>25</sup> Alatala naxa Sulemani xa fe ite Isirayilaka birin ya x̄ori. A naxa a xa mangɛya ite dangi Isirayila mangɛ singee birin na.

*Dawuda xa laaxira*

<sup>26</sup> Yisayi xa di Dawuda naxa mangɛya raba Isirayila birin xun na.

<sup>27</sup> A ɲɛ tongo naani mangɛya nan naba. A ɲɛ solofere raba Xebiron, a ɲɛ tongo saxan nun saxan naba Darisalamu.

<sup>28</sup> A naxa simaya fanyi kamalixi soto, a laaxiraya foriɲa fanyi nun sɛɛwɛ kui. Harige kanyi nan nu a ra, a xili fan nu gbo. A xa di Sulemani nan ti mangɛ ra a ɲoxɔɛ ra.

<sup>29</sup> Mangɛ Dawuda naxan nabaxi, a fole nun a rapɔnyi, na birin sɛbɛxi Annabi Samuweli, Annabi Natan, nun Annabi Gadi xa kitaabuie kui.

<sup>30</sup> Yi kitaabuie a xa mangɛya fanyi xa fe falama, naxan dangixi a xa waxati Isirayila boxi ma nun boxi gbɛtɛɛ ma.

**Soso Kitaabuie: Tawureta, Yabura, Inyila**  
**The Holy Bible in the Susu language of Guinea (Soso**  
**Kitaabuie: Tawureta, Yabura, Inyila Bible)**

copyright © 2015 Mission Évangélique Réformée Néerlandaise et les  
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative  
Commons Attribution-Noncommercial-No Derivatives license 4.0.

You may share and redistribute this Bible translation or extracts from it  
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2020-11-11

---

PDF generated using Haiola and XeLaTeX on 18 Apr 2025 from source  
files dated 29 Jan 2022

f1d08866-ea3e-5b9b-b506-e7690c5c61d2